


蘇州府志


卷之六十七  
流寓  
卷之六十八  
列女一



廿七

庫	文	閣	內
九	〇	八	漢
二	〇	八	書
七	二	三	門
架	冊	號	類

內閣文庫	
番號	漢 9083
冊數	32 ( 27 )
函號	292 13



蘇州府志卷第六十七

流寓

淺草文庫


凡自他方來僑居及占籍者皆名流寓以非此邦所產也  
吳中寓賢莫多於宋混之自范盧二志始乃姑蘇志以下  
既分流寓一門而人物內仍舊錯列何也今斷以來自先  
世生長於此者為人物餘皆移入流寓若同郡中遷徙則  
第於各傳內敘明無煩再見焉

周

澹臺滅明武城人字子羽事孔子南游至江從弟子三百人說

取予去就名施乎諸侯

史記索隱曰吳國東南有澹臺湖即其遺蹟



漢

梅福字子真壽春人爲南昌尉去官成帝時上書譏切王氏不見納居家常以讀書養性爲事至元始中王莽專政福一朝棄妻子去九江至今傳以爲仙其後有人見於會稽者變名姓爲吳市門卒云漢書

高獲字敬公汝南新息人少游學京師與光武有舊善天文曉遁甲能役使鬼神太守鮑昱每行縣輒式其廬獲遂遠遁江

南卒於石城章懷太子注石城在今蘇州西南石城人思之共爲立祠後漢書

按高獲事遍考吳地記以下諸書無言及者然章懷注後漢書謂在蘇州西南當時必有所據今郡西南有靈巖山一名硯石山吳越春秋云硯石山又名石城山越絕書云硯石山有石城今山下地名礪村出硯材疑礪村本作獲村因獲居

此得名後訛爲礪耳然無他證未敢遽定以章懷之注特存之若常熟舊志亦載獲入流寓謂縣宣化門外有石城里疑即其地則益無稽矣

梁鴻字伯鸞扶風平陵人受業太學家貧尚節介慕前世高士爲四皓以來二十四人作頌出關過京師作五噫歌肅宗聞而非之求鴻不得易姓運期名耀字侯光與妻子適吳依大家臯伯通居廡下爲人賃舂每歸妻爲具食不敢仰視舉案齊眉伯通察而異之曰彼傭能使其妻敬之如此非凡人也乃舍之於家鴻潛閉門著書十餘篇疾且困告主人曰昔延陵季子葬子於贏博之間不歸鄉里慎勿令我子持喪歸去及卒伯通等爲求葬地於要離冢傍咸曰要離烈士伯鸞清

高可令相近葬畢妻子歸扶風

後漢書

蔡邕字伯喈陳留圉人靈帝時為議郎以直言徙朔方赦還內寵惡之乃亡命江海遠跡吳會往來依太山羊氏積十二年  
在吳吳人有燒桐以爨者邕聞火烈聲知其良木因請裁為琴果有美音而其尾猶焦時名焦尾琴

後漢書

晉

范汪字元平仕晉為安西長史桓溫頻請為長史江州刺史皆不就自請還京求為東陽太守溫甚恨焉簡文帝作相除安北將軍徐兗二州刺史既而桓溫北伐令汪率文武出梁國以失期免為庶人朝廷憚溫不敢執汪屏居吳郡從容講肄

不言枉直

晉書

戴逵字安道譙國人善屬文能鼓琴工書畫徙居會稽之剡縣孝武帝時以散騎常侍國子博士累徵辭父疾不就郡縣敦逼不已乃逃於吳吳國內史王珣有別館在武邱山逵潛詣之與珣遊處積旬會稽內史謝元慮逵遠遯不返請絕召命逵復還剡

時會稽謝敷字慶緒澄靖寡欲入太平山十餘年召皆不就初月犯少微少微一名處士星占者以隱士當之逵有美才人或憂之俄而歎死故會稽人

士以嘲吳人云吳中高士便是求死不得死

晉書

戴顓字仲若父逵兄勃並隱遯有高名顓復修其業善琴書居剡下桐廬縣多名山兄弟復共游之因留居止勃疾患醫藥不給顓謂勃當干祿以濟乃求海虞令事垂行而勃卒乃止

桐廬僻遠難以養疾又出居吳下吳下士人共爲築室聚石引水植林開澗少時繁密有若自然乃述莊周大旨著逍遙論禮記中庸篇三吳將守及郡內衣冠要其同遊野澤堪行便去不爲矯介衆以此多之宋國初建元嘉中徵並不就衡陽王義季鎮京口長史張邵與顯姻通迎止黃鵠山十八年

卒

南史

褚伯玉字元璩錢塘人少有隱操居剡瀑布山下三十餘年王僧達爲吳郡苦禮致之伯玉不得已停郡信宿纔交數言而退寧朔將軍邱珍孫與僧達書曰聞褚先生出居貴館此子滅景雲棲不事王侯有年載矣自非折節好賢何以致之儻

達荅曰褚先生從白雲游舊矣近邀其來冀慰日夜比談討芝桂借訪薜蘿若已窺煙液臨滄洲矣唐邱丹荅韋應物詩云還同褚伯玉入館忝州人謂此也

吳郡圖經續記本南史

齊

何求字子有鬻人父鑠宋宜都太守求元嘉末爲文挽郎歷太子洗馬丹陽郡丞清退無嗜欲後爲太子中舍人泰始中妻亡還吳葬舊墓除中書郎不拜仍住吳隱居波若寺足不踰戶人莫見其面宋明帝崩出奔國哀除永嘉太守一夕忽乘小船逃歸吳隱武邱山齊永明四年拜大中大夫不就卒初鑠素有風疾無故害求母王氏坐法死求兄弟以此無宦情

何點字子皙求弟年十一居父母憂幾至滅性及長感家禍絕  
昏宦博通羣書善談論家本素族親姻多貴仕點雖不入城  
府而遨遊人間不簪不帶以人地並高無所與屈或乘柴車  
躡草屨恣心所適致醉而歸故世論以點爲孝隱士弟允爲  
小隱士士大夫多慕從之時人稱重其通號曰遊俠處士兄  
求卒點菜食不飲酒訖於三年泰始末徵太子洗馬齊初累  
徵中書侍郎太子中庶子並不就與陳郡謝淪吳國張融會  
稽孔德璋爲莫逆友點少時嘗患渴利積歲不愈後在吳中  
石佛寺建講晝寢夢一道人形貌非常授丸一掬夢中服之  
自此而差時人以爲淳德所感梁武帝與點兄弟有舊天監

初以侍中召不就二年卒

何允字子季求幼弟出繼叔父曠更字允叔年八歲居憂毀若  
成人晚乃折節好學仕齊至建安太守政有恩信後爲中書  
令拜表解職東之會稽居若邪山雲門寺初兄求點並栖遁  
求先卒允又隱世謂點爲大山允爲小山亦曰東山號何氏  
三高永元中徵爲太常太子詹事梁武帝踐阼詔爲特進光  
祿大夫並不就又遷秦望山起學舍初何氏過江自晉司空  
充並葬吳西山允家世年皆不永唯祖尙之至七十二允年  
登祖壽乃移還吳作別山詩一首言甚淒愴至吳居武邱山  
西寺講經論學僧徒隨之東境守宰經途者莫不畢至允常

禁殺有虞人逐鹿鹿逕來趨允伏而不動又有異鳥如鶴紅色集講堂馴狎如家禽昭明太子欽其德致手令褒美之大通三年卒年八十六以上並南史按三何先世自晉過江皆葬於吳舊志載入人物似乎可從然史傳明言鬻人又不常厥居其來吳也止居佛寺冲入流寓為是

梁

顧越字允南吳郡鹽官人所居新坂黃岡世有鄉校由是顧氏家傳儒學專門教授越勵精學業徧該經藝深明毛詩特善莊老尤長論難兼工綴文梁武帝時除五經博士承聖二年授晉安王府諮議參軍領國子博士越以世路未平無心仕進因歸鄉栖隱於武邱山與吳興沈炯同郡張種會稽孔奐

等每為文會陳天嘉中詔侍東宮讀遷給事中黃門侍郎廢

帝即位拜散騎常侍兼中書舍人

南史

唐

殷懌字易從曲阿人少負志氣博學善屬文弱冠遊太學籍甚公卿間天寶末知天下將亂乃趣裝東歸侍母居吳郡吳中士大夫得從之游者鄉黨以為榮採訪使李希言辟為從事

奏授試崑山尉不就子侑遂顯宦

吳郡志本馮宿集

張祐字承吉南陽人來寓蘇州有詩名白居易刺杭時江東進士多奔杭取解屬時以素望取士祐自意必首薦既而徐凝冠多士祐偃蹇不隨鄉試令狐楚鎮天平表祐新舊格詩三

百篇以獻祐至京師爲元稹所抑寂寥而歸嘗自號釣鰲客  
會昌初李紳節度淮南壯其爲人厚加禮致祐長於宮詞掖  
庭多吟諷之杜牧守池與祐爲詩酒友寄詩云誰人得似張  
公子千首時輕萬戶侯大中間卒於丹陽

盧志

楊收字藏之馮翊人自言隋越國公素之後父遺直位終濠州  
錄事參軍客於蘇州講學爲事因家於吳生四子發假收嚴  
發字至之太和四年登進士第又以書判拔萃累遷左司  
郎中宣宗追尊順宗憲宗尊號禮院奏廟中神主已題舊號  
請改造及重題詔禮官議發議禮無改造之文亦無重加尊  
諡改題之例宜但告新諡於廟改造重題恐乖禮意時宰相

覆奏就神主改題知禮者以發議爲是改太常少卿出爲蘇  
州刺史蘇發之鄉里也恭長慈幼人士稱之還改福建觀察  
使以善績聞移授嶺南節度使貶婺州刺史卒子乘亦登進  
士第有俊才尤能爲詩歌歷顯職 假字仁之進士擢第鄭  
覃刺華州署爲從事從覃鎮京口得大理評事入爲監察轉  
侍御史由司封郎中轉太常少卿出爲常州刺史卒官初遺  
直娶元氏生發假繼室長孫氏生收嚴收長六尺二寸廣額  
深頤踈眉秀目寡言笑博聞強記初家寄潯陽甚貧收七歲  
喪父居喪如成人長孫夫人知書親自教授十三略通諸經  
義善於文詠吳人呼爲神童收以仲兄假未登第久之不從



鄉賦開成未假擢第是冬收之長安明年一舉登第杜悰鎮揚州延收署節度推官悰領度支以收爲巡官悰鎮東蜀奏授掌書記移鎮西川復管記室宰相馬植奏授渭南尉充集賢校理改監察御史收辭以仲兄假從事侯府不忍先爲御史復爲悰節度判官植乃以收弟巖爲渭南尉代收之任周墀鎮東蜀表巖爲掌書記墀至鎮而悰卒乃辟巖爲判官兄弟同幕爲兩使判官時人榮之俄而假自浙西觀察判官入爲監察御史收亦自西川入爲監察兄弟並居憲府裴休作相以收深於禮學用爲太常博士時收弟巖亦自揚州從事入爲監察尋丁母憂歸蘇州旣除崔珙鎮淮南以收爲觀察

支使入爲侍御史歷吏部員外郎上言先人未葬旅殯毘陵擬遷卜於河南偃師請兄弟自往從之及葬東周會葬者千人宰相令狐綯用收爲翰林學士知制誥拜中書舍人轉兵部侍郎學士承旨左軍中尉楊元价以收宗姓深左右之乃加銀青光祿大夫中書侍郎同平章事累遷門下侍郎兵部尚書收以南蠻擾亂請於洪州置鎮南軍屯兵積粟以餉南海天子嘉之進位尚書僕射太清太微宮使弘文館大學士晉陽縣男收居位稍務華靡門吏僮奴倚爲姦利時楊元价弟兄掌機務招來方鎮之賂屢有請託收不能盡從元价以爲背已由是傾之八年十月罷爲宣歙觀察使韋保衡作相

又發收陰事明年八月貶端州司馬尋長流驩州又詔賜死  
 子鑿鉅鱗皆登進士第鉅乾寧初以尚書郎知制誥充翰林  
 學士拜中書舍人戶部侍郎封晉陽縣男從昭宗東遷為左  
 散騎常侍卒鱗乾寧中累遷尚書郎 嚴字凜之會昌四年  
 進士擢第累遷給事中工部侍郎翰林學士兄收作相請外  
 職拜浙東觀察使收罷貶官嚴坐貶邵州刺史收得雪嚴量  
 移吉王傅累遷兵部侍郎判度支病卒二子涉注涉乾符二  
 年登進士第昭宗朝累遷吏部尚書輝王即位本官平章事  
 加中書侍郎謙退善處竟以令終注中和二年進士第昭宗  
 朝累遷戶部侍郎 舊唐書 按楊氏自收兄弟家蘇州至涉  
 之子凝式又為洛陽人矣舊皆入人物今

從通志入流寓以舊唐書源委尤晰故詳錄焉

宋

蔣堂字希魯本宜興人徙於蘇祥符五年進士任侍御史論禁  
 中火宜責躬修德不必歸咎宮人郭皇后廢極論不可出為  
 淮南發運使薦部吏二百員累遷樞密直學士歷知應天河  
 中府洪杭益蘇州後十二年再守蘇遂謝事以禮部侍郎致  
 仕家於靈芝坊堂為人修潔遇事不少屈好學工文詞延譽  
 晚進至老不倦卒年七十五有吳門集二十卷 吳郡志 盧  
 熊志云初堂  
 徙家吳中守杭時復治溪館將歸休焉既而告老賦隱園詩  
 自號遂翁所居嘗有芝草知州李仲偃名其地曰靈芝坊舊  
 列人物今入流寓

蘇舜欽字子美參知政事易簡孫父耆有才名嘗爲工部郎中直集賢院舜欽少有大志貌奇偉當天聖中學者爲文多病對偶獨舜欽與穆修好爲古文歌詩一時豪傑多從之游初以父任補太廟齋郎調滎陽尉尋舉進士改光祿寺主簿知長垣縣遷大理評事范仲淹薦爲集賢校理監進奏院舜欽娶宰相杜衍女衍時與范仲淹富弼在政府多引用一時聞人欲更張庶事御史王拱辰等不便其所爲會進奏院祀神舜欽與右班殿直劉巽輒用鬻故紙公錢召妓樂間多會賓客拱辰諷其屬魚周詢劾奏因欲搖動行事下開封府劾治於是舜欽與坐除名同時會者皆知名士因緣得罪逐出四

方者十餘人拱辰等喜曰吾一舉網盡矣舜欽旣放廢寓於

吳中後二年得湖州長史卒舜欽數上書論朝廷事在蘇州

買水石作滄浪亭益讀書發憤懣於歌詩其體豪放往往驚

人善草書每酒酣落筆爭爲人所傳及謫死世尤惜之

宋史

李鼈壽昌令璲之子璲濮州人咸平中自睦州罷官北歸舟過

吳江而卒卽葬於天平山鼈時尙幼奉母鄭家於蘇天聖中

鄭卒與燧合葬鼈倚杖寢苦廬於墓側早夜悲慟甘露再降

於松栢朝野名士皆爲賦詩鼈又以母常誦金剛經刺血爲

書刻於墓下郎中楊備表之

盧志

徐祐字受天擢進士第居官以清白稱官至左司員外郎以都

官郎中致仕慶歷中屏居蘇州作山亭胥門外為登臨之地與少卿葉參為九老會卒年七十五子仲謀典郡持節以職方郎中致仕祐通州靜海人也盧志

楊備郎中天聖中為長溪令夢中忽作詩日月俸蚨錢數甚微不知從宦幾時歸東吳一片烟波在欲問何人買釣磯及寤心潛異之明道初宰華亭俄丁內艱遂家於吳樂其風俗之美安而弗遷因悟夢中所作幾於前定嘗效白體作我愛姑蘇好十章又作姑蘇百題詩行世中吳紀聞 宋詩紀事備歷中為尚書虞部員外郎分司南京上輕車都尉

盧革字仲辛德清人少舉童子至登第年才十六慶歷中知龔

州蠻入寇桂管騷動革經畫軍須先事而集歷知婺泉二州提點廣東刑獄福建湖南轉運使復請外神宗謂宰相曰革廉退如是宜與嘉郡遂為宣州以光祿卿致仕用子秉恩轉通議大夫退居於吳十五年吳郡志今盧提刑橋因其宅以名秉為發運使得請歲一歸覲後帥涓乞解官終養帝數賜詔慰勉時以為

榮卒年八十二宋史

滕元發初名甫避高魯王諱以字為名更字達道本東陽人九歲能賦詩敏捷過人范文正之父為諸舅見而奇之教以為文文正為鄉郡安定胡先生居於郡學元發來從學門人以千數第其文常為首舉進士試於廷擢第三以聲韻不中程

黜之後八年復中第三通判湖州孫沔守錢塘一見日後當  
 為賢將授以治劇守邊之要名試學士院判吏部南曹同修  
 起居注知制誥知諫院王陶論宰相不押班為跋扈上以問  
 元發元發曰宰相固有罪然以為跋扈則臣以為欺天陷人  
 矣知開封府遷御史中丞抗論得失為多河朔地震壞城廬  
 命為安撫使還復知開封府除翰林學士出知鄆州移定州  
 入覲力言新法之害徙青州留守南都知齊鄧二州坐累知  
 安州以言者復貶筠州已而知湖州哲宗即位徙蘇揚二州  
 除龍圖閣直學士復知鄆州歲方饑乞淮南米二十萬石為  
 備全活五萬人徙真定河東除龍圖閣學士復知揚州未至

而卒年七十一贈左銀青光祿大夫諡章敏元發慷慨豪邁

不拘小節近世名將無及者葬陽山子孫遂為吳人

中吳紀聞吳郡

志合纂按東都事略宋史但言東陽人盧志謂元發父早卒葬吳縣子孫遂為蘇人今從中吳紀聞吳郡志入流寓

錢藻字醇老吳越王鏐五世孫舉進士又中制科為人清謹寡

過居守繩墨為治簡靜立朝無矯亢之節亦不為雷同處勢

利淡如也人稱其長者英宗時為秘書校理上書請太后還

政通判秀州神宗時稍遷直舍人院同修起居注擢知制誥

直學士院除樞密直學士知開封府遷翰林侍讀學士卒年

六十一

以上東都事略

初藻與滕元發俱受學於安定胡先生藻用

和州貫登第母丁氏葬天平山遂為蘇人

盧志

元絳字厚之其先臨川危氏徙杭州易姓曰元絳五歲能詩長登第調江寧推官知永清海門二縣擢江西轉運判官知台州入爲度支判官歷廣東兩浙河北轉運使鹽鐵副使知福州名爲翰林學士知開封府拜參知政事以太子少保致仕絳所至有威名而無特操在翰林諂事王安石及其子弟時論鄙之然工於文辭爲流輩推許旣得謝帝眷之曰卿可營居京師朕當資金幣絳曰臣有田廬在吳乞歸鶩之卽築室都城旣行追賚白金千兩敕早還絳至吳踰歲以老病奏恐不能奉詔三年而卒年七十六贈太子少師諡章簡

宋史吳郡志

絳居帶城橋致仕還吳中與程公闢諸公爲九老會鄉人號其居曰袞繡坊有玉堂集三十卷按東都事略作錢塘人

蓋絳生長杭州晚居吳中諸志載入人物非是今改入流寓

沈邁字文通錢塘人舉進士通判江寧府除集賢校理知制誥出知越州徙杭州爲人踈雋博達明於吏治令行禁止奸猾屏息名知開封府遷龍圖閣直學士治如在杭州早作視事逮午而畢出與親舊還往從容燕笑沛然有餘暇士大夫交稱其能拜翰林學士判流內銓丁母憂英宗閱其去賚黃金百兩仍命扶喪歸蘇州旣葬廬墓下服未竟而卒年四十世咨惜之

宋史按舊志謂邁從弟括隨兄徙蘇州列括傳於人物今考吳郡志進士題名嘉祐八年下有括名史傳不言徙蘇事或當時偶寄籍耳邁家蘇州葬母於吳旣有本傳可据宜入流寓舊志立括傳而不立邁傳非是

張景修字敏叔

盧志云常州人僦居吳中

人物瀟灑文章雅正登治平四年

進士第雖兩爲憲漕五領郡符其家極貧窶僦市屋以居初爲汝州梁令作送童子朱天錫詩天錫旣到闕下忘取本州公據爲禮部所却因擊登聞鼓繳景修詩爲證神宗一見大稱賞之翌日以語宰相王珪卽令召對珪言不欲以一詩召人恐長浮競不若俟其秩滿然後擢用之遂止令中書籍記姓名比罷官神宗已升遐矣景修歷仕三朝每登對上必問聞卿作朱童子詩試爲舉似由此詩名益著終祠部郎中年七十餘卒平生所作詩幾千篇號張祠部集子漢之嘗宰崑

山

中吳紀聞

林旦本福州人祖高父槩皆擢進士槩天亡高亦卒於官妻黃

攜其孫八人將歸葬閩道出姑蘇時蔣堂知蘇州旦年十二與兄希贄文上謁蔣大奇之給以戴城橋官屋爲葬二櫬於寶華山仍遣其猶子之奇與同學後希旦及其弟郤顏並登科遂爲吳人旦熙寧中由著作佐郎主管淮南常平擢太子中允監察御史裏行居臺五月以論李定罷守故官久之幹當奏院陳繹又摭其前論罷之累年乃簽書淮南判官入爲太常博士工部考功員外郎元祐元年拜殿中侍御史卽疏言竊見去歲五月詔求讜言士民爭欲自獻及詳觀詔語名雖求諫寔欲拒言約束丁寧使不得觀望迎合犯令干譽終之必行黜罰以恐懼之於是人人知戒言將出而復止至於

再申諭告方達天聰聞初詔乃蔡確章惇造端今二人既去其餘黨常懷醜正惡直之心願深留宸慮以折邪謀遂論呂惠卿鄧綰猶泣小郡小郡之民奚罪焉乞投散地以謝天下又論王中正石得一雖已薄責得一所任肘掖小人如翟勅之徒亦宜編削詔並降支郡管校又論崔台符賈種民舞文

深酷之罪皆逐之出為淮南轉運副使終河東轉運使

王志明曰

林氏占籍於蘇見南豐集雲麓漫鈔中吳紀聞諸書并題名記范志于旦等皆不立傳或有惡於希也然不應并不傳且盧王志於處傳云父旦自有傳然志中實無意其偶遺之耳今刪史傳增入按旦雖當載人物然非生於吳者今故採王氏之言移入流寓

賀鑄字方回孝惠皇后族孫博學強記工五言尤長度曲初娶

宗女隸籍右選元祐中李清臣執政奏改通直郎通判泗州又倅太平州以尚酒使氣不得美官悒悒不得志食官祿退居吳下引遠世故家藏萬餘卷手自讐校無一字誤家貧貸子錢自給有負者輒折券與之秋毫不以丐人所為詞章往往傳播人口建中靖國時黃庭堅自黔中還得其江南梅子之句以為似謝元暉有慶湖遺老集

宋史

米芾字元章襄陽人愛潤州山水結海嶽菴嘗游寓於吳子友

仁官於是女亦歸於是故宋史稱為吳人

姑蘇志都穆寓意編云按米氏襄

陽人而宋史以為吳人觀海岳撰樂圃墓表云予昔居郡與先生遊今觀其子元暉自題山水跋云紹興己未除守琅邪待次平江寓居大姚村妹家戲作則米老父子皆嘗居吳故其女嫁大姚其實非吳人也



李無晦字中行自雪川徙居吳江高尚不仕放意詩酒晚治園亭名醉眠蘇子瞻兄弟嘗過之為留題云

松陵文獻

王綯字唐公秦正懿王審琦五世孫宣和七年廷試為詳定官多取議論剴切者寘甲科建炎初為御史中丞金人入寇具陳攻守之策宰相不能用車駕南渡扈從至鎮江從容奏曰陳東以忠諫被誅此其鄉里也上即命賜其家官其子東宮初建以資政殿學士權太子少傅三年拜參知政事明年罷紹興三年出知越州及上幸越韓世忠邀擊虜歸騎於揚子江綯議遣兵追襲與世忠夾擊之同政者議不合遂求去御書霖雨思賢佐丹青憶老臣十字賜之綯為人剛正有守立

朝無所阿附及居政府每以祿不及親自奉甚薄不置第宅晚寓崑山之薦巖寺蕭然一室服食器用無異寒士天性仁孝矜恤嫻族無所不至紹興七年卒年六十四諡文恭前期二日書戊戌二字示左右及卒果然平居無他嗜好惟以讀書為樂其文溫潤典雅深於理致有內外制四十卷奏議三十卷進讀事實五卷論語解二十卷孝經解五卷羣史編八十卷內典略錄一百卷子志

盧

程俱字致道開化人以外祖尚書左丞鄧甫恩補吳江王簿政和間監舒州太湖茶場坐上書論事罷歸來家於吳葺小屋號蝸廬紹興初擢中書舍人其文典雅閑奧為時所稱

宋史參吳

郡志

尹焞字彥明世爲洛人師事程頤以篤行著靖康初召至京賜號和靖處士金人陷洛闔門被害焞死復甦劉豫以禮聘焞不從紹興中累除秘書監太常少卿權禮部侍郎徽猷閣待制提舉太平觀致仕九年寓平江虎邱西菴時年七十二年卒於會稽寓舍

宋史參  
盧志

翟汝文字公異其先丹陽人後徙常熟

史但云丹陽人此本中吳紀聞

登進士

第以親老不調者十年擢議禮局編修官召對徽宗嘉之除秘書郎三館士建議東封汝文曰治道貴清靜今不啓上述三代禮樂而師秦漢之侈心非所願也責監宿州稅久之召

除著作郎遷起居郎皇太子就傅命汝文勸講除中書舍人言者謂汝文從蘇軾黃庭堅遊不可留贊書之任出知襄濟唐陳四州召拜中書舍人外制典雅一時稱之命同修國史遷給事中內侍梁師成強市百姓墓田廣其園囿汝文言於上師成諷宰相黜汝文守宣州召爲吏部侍郎出知廬州徙密州密負海產鹽蔡京屢變鹽法盜販者衆有司窮治黨與汝文曰祖宗法獲私商不詰欲靖民也今繫而虐之將爲厲矣悉縱之欽宗卽位召爲翰林學士改顯謨閣學士知越州兼浙東安撫使楊應誠請使高麗圖迎二帝汝文奏應誠欺罔君父若高麗辭以大國假道以至燕雲金人却請問津以

窺吳越將何辭以對後高麗果如汝文言紹興元年召為翰林學士除參知政事同提舉修政局時秦檜相四方奏請填委未決汝文嘗受牒書字用印直送省部入對乞治堂吏受賂者檜怒面劾汝文專擅罷去卒先是汝文在密檜為郡文學汝文薦其才故檜引用之然汝文性剛不為檜屈對案相詬至目檜為濁氣汝文風度翹楚好古博雅精於篆籀有文集行世

宋史 中吳紀聞云  
門人諡為忠惠先生

邱礪字師說世為朐山人高唐丞礪之弟也登政和八年第建炎初知吳江縣因家常熟入為國子監丞御史臺檢法大理寺丞知筠泰建三州除福建提舉兼提刑改轉運判官在建

凡十年惠政不可勝紀秦檜當國以礪同年生每示意嚮欲以孫與礪女為婚礪不肯力請祠歸杜門以詩酒自適奉祠凡十二年卒年七十六贈光祿大夫礪天性純實自律甚嚴更迭中外二十年薄田數百畝不給則舉質以繼處之裕如有易議及超然類橐杜詩集句四子璪應博學宏詞科璋通判寧國府琛提舉福建市舶璠知太湖縣

盧志

曾懷字欽道宣靖公公亮曾孫世居泉州晚寓常熟宣和元年以父任調金壇簿南渡後授烏江令浙市舶知江州孝宗踐阼改真縣濠州太平州通判提舉兩浙市舶知江州孝宗踐阼改真州浙西提舉以懷有應用才除度支員外郎別置拘催錢物

所令專行以豐裕聞超除權戶部侍郎兼提領贍軍諸庫乾道初真除戶部侍郎再歲除尚書在版曹凡五年未嘗以錢穀語人凡錢穀之數州郡所積與夫出納之多寡纖悉必記上以蕭何劉晏目之丐閒除龍圖閣知婺州甫三月趣召復為戶部尚書八年賜同進士出身除參知政事九年十月拜右丞相封魯國公淳熙元年除觀文殿大學士官觀甫及故里復拜右丞相兼樞密使以疾免朝參惟令入堂治事遇大政則宣引特令製輕小金帶以賜復力上印綬仍除觀文殿大學士歸僅三月遂卒年六十九贈少保懷由世家登宰輔以清約自持為相侃侃得大臣體有文集三卷

琴川志

李衡字彥平江都人幼善博誦為文操筆立就登進士第授吳

江主簿

事見吳江名宦

後知溧陽縣專以誠意化民民莫不敬夏秋

二稅以期日榜縣門鄉無吏跡而輸送先他邑辦歷四年獄未嘗繫一重囚隆興二年金犯淮堧人相驚官沿江者多送其孥衡獨自浙右移家入縣民心大安盜蝟起旁境而溧陽靖晏自如帥汪徹轉運使韓元吉等列上治狀詔進一秩尋召入為監察御史歷司封郎中樞密院檢詳出知溫婺台三州惟婺嘗蒞其治加直秘閣而衡引年乞身懇懇不休上累卻其奏除秘閣修撰致仕上思其樸忠旋召除侍御史固辭不獲命差同知貢舉會外戚張說以節度使掌兵柄衡力疏

其事謂不當以母后肺腑為人擇官廷諍移時改除起居郎  
 章五上請老愈力上知不可奪仍以秘撰致仕時給事中莫  
 濟不書勅翰林周必大不草制右正言王希呂亦相繼論奏  
 同時去國士為四賢詩以紀之衡後定居崑山結茅別墅杖  
 履徜徉左右惟二蒼頭聚書踰萬卷號曰樂菴卒年七十九  
 衡自宣和間入辟雍同舍有趙孝孫者洛人也其父實師程  
 頤家學有源勸衡讀論語曰學非記誦詞章之謂所以學聖  
 賢也不可有絲毫偽處衡心佩其訓雖博通羣書而以論語  
 為根本臨沒沐浴冠櫛儵然而逝

宋史

樂備字順之一字功成由淮海徙家崑山與范成大同登紹興

二十四年進士備有學行能文章尤長於詩與成大馬先覺

共結詩社官至軍器監簿

盧志

崔敦詩字大雅世家靜海晚寓常熟登紹興三十年進士第主

高郵簿兩浙運幹除秘書省正字繼兼翰林權直早有文名

所為制詞溫潤詳雅兼崇正殿說書權給事中遭內外艱時

翰林學士周必大乞補外壽皇中批問吏部尚書韓元吉曰

崔某今安在元吉具言之名見除樞密院編修官復為權直

既拜命言翰林權直為名未正即更為學士院權直遷著作

郎兼權吏部郎官又兼崇政殿說書進國子司業改權直學

士院拜中書舍人加侍講直學士院敦詩賦性端厚議論疏

通知大體自直宿遞講遇引對所陳必剴切至造膝密啓有家人不得覘其橐者上深爲器許卒年僅四十四贈中大夫有文集三十卷內外制橐二十三卷奏議總要五卷通鑑要覽六十卷制海十編監韻五編

琴川志

湯壽字君寶瀏陽人淳熙十四年進士調德安府學教授轉三省樞密院架閣遷國子博士時召朱熹爲講官未幾辭歸壽疏言熹以正學爲講官四方望其有啓沃之益曾未踰時輒聽其去必駭物論宜追召熹還仍授講職不報由是浸忤權相意而壽之直聲亦大聞於時歷禮部郎官出知台州徙常州開禧三年謫居贛州嘉定四年復元官寓居平江後爲大

理少卿進直徽猷閣致仕壽負直概與韓侂胄陳自強不合故屢嗾言者中傷生平奉祠閒居之日多於敷歷在禮曹例掌三省奏記屬詞務持大體不爲阿曲言者撫其語涉訕上朝廷實知其無他故起復制詞有清風峻節之語

宋史參盧志

劉過字改之號龍洲廬陵人宋南渡後以詩俠名湖海間陳亮陸游辛棄疾世稱人豪皆折節與交宰相周必大欲容之門下不就故人潘友文宰崑山延致之過雅志欲航海因抵縣留焉卒葬馬鞍山過嘗抗疏光宗請過宮屢與時宰陳恢復方略謂中原可一戰而取詞極剴切性喜飲酒詞氣橫放英

特兼以感慨一時無前

楊維禎劉龍洲墓表參姑蘇志

鄭準字器先開封人華原郡王居中諸孫祖父皆寓崑山準由  
蔭補登進士歷知袁州生長王侯家而氣習泊素厚於道義  
輕財好客赴人之急買田贍族有范文正公義莊之風子端

守高郵姪竦知秦韶袁三州

姑蘇志

陳貴誼字正甫本福清人父宗名因贅居崑山登進士終禮部

尚書貴誼登慶元五年進士又中嘉定元年博學宏詞科紹

定中歷官參知政事卒諡文定為名執政事具宋史

崑山舊志

魏了翁字華父蒲江人慶元進士紹定中累遷至同簽書樞密

督視京湖軍馬併領江淮封臨邛郡開國侯開府江州已而

以浙東安撫使就醫平江嘉熙初卒累贈太師秦國公諡文

靖仍賜第於平江葬高景山政學大節具在宋史所著鶴山

文集九經要義周易集義易舉隅周禮井田圖說古今考經史雜錄

師友雅言總若干卷

姑蘇志

高定子字瞻叔本魏了翁同產兄也嘉泰二年舉進士歷知夾

江縣長寧軍綿州政業著聞累遷禮部尚書兼直學士淳祐

初拜翰林學士知制誥一日草五制未更燭而成理宗大喜

進端明殿學士簽書樞密院兼參知政事知福州福建安撫

使固辭提舉洞霄宮請致仕不許改知潭州力辭賜第平江

仰家橋深衣大帶日以著述自娛以資政殿學士轉一官致

仕卒贈少保定子之學根柢羣經而於諸子百氏博極淹貫

爲文法度謹嚴高出時輩學者稱著齋先生所著文集北門類彙微垣類彙緝熙講義奏議歷官表奏經說行世子孫多居常熟定子兄稼字南叔由進士歷利州路提刑知沔州死節贈龍圖謚忠襄稼子斯得第進士官至簽書樞密參知政事學者稱恥堂先生

宋史盧志合纂

敖陶孫字器之長樂人贅居崑山有詩名韓侂胄逐丞相趙汝愚死貶所陶孫在太學賦詩弔之有曰九原若見韓忠獻休說渠家五世孫侂胄大怒捕送大理寺掠治體無完膚編管

嶺南後登慶元五年進士簽判泉州自號臞菴

周世昌崑山志

方萬里字子萬其先嚴州人元符以來世登儒科萬里幼失父

伯兄永嘉簿賜復攜之侍母來吳因家焉登進士教授江陰軍儲義廩置小學謹禮儀紹定五年以朝奉郎知江陰軍累至太常寺簿贈正奉大夫萬里問學履行遠近敬之趙汝述守平江遇之甚至汝述卒賓客皆散去萬里獨護喪數程時人義之子洪字養原進士

姑蘇志

邱岳字山甫高唐丞礮之曾孫也祖琚紹興中與子松歸朝授琚迪功郎招撫司准備差遣松下州文學遂家高郵琚卒葬吳縣岳松之子嘉定十年進士授太湖尉辟蘄州推官紹定三年李全弄兵於淮東安撫副使趙范提刑趙葵奉命誅討辟岳入幕贊決謀議卒歿凶逆歷通判黃州知真州端平三



年蒙古來攻岳設伏敗之殺其驍將又選勇士襲敵營焚其  
廬帳遂引去改兵部郎中淮東提刑兼提舉常平知太平州  
兼江西轉運徙知江州兼沿江制置副使移鎮淮東累疏求  
去淳祐十年以工部尙書召尋謝事自鎮江徙居常熟寶祐  
初授華文閣直學士沿江制置使兼知建康府江東安撫兼  
營田使行宮留守節制和州無爲軍安慶三郡屯田使丞相  
遺書奉旨趣行舟發京口時北兵方闖廬和卽調兵赴援趣  
新知和州印應雷往應雷奮入卒保和州三年授龍圖閣學  
士致仕卒年六十九岳在眞州及淮閩兵將樂爲之用凡四  
禦大敵未嘗敗衄泗州之捷俘獲不可勝計功尤偉爲人簡

重言不妄發及論議洞然表裏理宗嘗書忠實二字賜之官  
至正議大夫封東海郡侯贈特進

盧志

鄧若水字平仲井研人博通經史爲文章有奇氣吳曦叛欲起  
兵討之不就乃仗劍徒步如武興欲手刃曦道聞曦死而還  
人竊笑其狂而壯其志登嘉定十三年進士第對策論史彌  
遠奸狀乞罷其相考官寘之後列理宗卽位應詔上封事言  
彌遠不立濟王而立陛下握大權擅國政以盛章輩表裏爲  
奸使區區李全得以倔強於外陛下不加天誅則無以固大  
位而平大難矣制置司不爲附驛還之格當改官爲彌遠所  
抑嘉熙間召爲太學博士草奏數千言大概欲斲棺戮尸以

正彌遠之罪出為通判寧國府書不得上旋以言罷遂不復仕隱居洞庭山後歸蜀

盧志

王萬字處一家世婺州父遊淮間萬生長濠州少忠伉有大志究心當世急務尤精於邊防要害登嘉定十六年進士第調和州教授端平元年主管吏部架閣文字遷國子學錄明年添差通判鎮江府時金初滅當路知其人豪咨問者旁午已而元兵壓境三邊震動萬條具沿邊事宜徧告大臣敷陳累數萬言三年授樞密院編修官嘉熙元年兼權屯田郎中差知台州至郡日惟蔬飯終日坐聽事事至立斷吏無所售往往改業散去民亦化之不復訟上下肅然郡以大治才五月

乞祠去

盧志萬知台州嘉熙二年乞官觀又辭名命來居常熟

四年擢監察御史首論

史宅之故相之子曩者弄權不當復玷從班上命丞相再三諭旨迄不奉詔上不得已出宅之知平江府又論之疏凡五上史嵩之自江上董師入相萬又首論之遷大理少卿即日還常熟寓舍遷太常少卿差知寧國府召赴行在奏事出為福建提點刑獄四川宣諭司參議皆力辭詔特轉朝奉郎守太常少卿致仕卒嵩之罷相衆方交論其非上思萬先見親賜御札謂萬立朝謇諤古之遺直聞其母老家貧朕甚念之賜新會五千貫田五百畝贍其家萬之學專有得於時習之語終其身行無不顧其言遺文有時習編及他奏劄凡十卷

宋史

印應雷通州靜海人父武子招信軍判官來寓常熟應雷登嘉熙二年進士知和廬二州寶祐二年北兵侵和時應雷新之任以制司命率兵突入士氣益張卒保其城咸淳間權兵部侍郎兩淮安撫制置使兼知揚州封靜海縣開國伯食邑七百戶贈端明殿學士弟應飛字德遠淳祐元年進士第擢監察御史差判鎮江府知鄂州兼湖北運判開慶元年元兵圍鄂都統張勝登城誘以約降元兵信之盡焚城外民居歸然獨一壘存應飛自外督兵來援圍遂解除戶部侍郎淮東總領知鎮江府卒贈朝議大夫

鄧韞常熟志  
參姑蘇志

陳元大字孔碩候官人樞密直學士襄之後嘉熙二年進士為溫州教授遊常熟愛其風土遂徙家焉元大生長於閩去海濱四先生倡道未遠師承切而體驗明著四書講義行世學者稱北山先生子某克紹家學人稱后山先生

鄧志參昭  
文新志

高晞遠字照菴通州人咸淳德祐間通判平江府城潰家亦散亡浮游江湖往來九峯三泖間嘗館於石浦衛參政涇家以所學私淑諸人晞遠資稟秀朗學問該博尤精邵子之學謂邵子觀物以色氣味聲色氣味有一萬七千二十四人之目鼻口不能盡其觀嗅嘗唯一萬七千二十四聲可以字別舉聲之一例而色氣味可類推由是而精通音律嘗手裁竹為

管以定五音六律進反之間疏數之節細微之辨毫髮弗差  
晚更嗜參同契曰語言近古大抵以納甲之說寓其行持進  
退之度至如陰陽術數太乙六壬咸究其妙又因動聞聲可  
以驗吉凶定禍福其學後皆無傳者

盧志參  
姑蘇志

鄭思肖字憶翁號所南福之連江透鄉人也祖咸卒於枝江縣  
主簿父震字叔起號菊山淳祐道學君子爲安定和靖二書  
院山長景定壬戌卒於吳葬長洲縣甌山母樓氏妹爲比邱  
尼名普西思肖太學上舍應博學宏詞科侍父來吳寓條坊  
巷元兵南下扣闥上太皇太后幼主疏辭切直忤當路不報  
初名某宋亡乃改今名思肖卽思趙憶翁與所南皆寓意也

素不娶了然一生念念不忘君形於詩文中遇歲時伏臘野  
哭南向拜人莫測識聞北語必掩耳亟走人亦知其孤僻不  
以爲異也坐臥不北向扁其室曰本穴世界以本字之十置  
下文則大宋也精墨蘭自更祚後爲蘭不畫土根無所憑藉  
或問其故則云地爲番人奪去汝猶不知耶不欲與雖迫以  
勢權不可得也天日本中峯禪林之白着聞思肖名欲見未  
果偶會於孝子梅應發家一見各默不語坐久之本忽云所  
南何不說法思肖曰兩眼對兩眼無法可說及別去本又云  
博學老子思肖卽曰世法和尙趙孟頫才名重當世思肖惡  
其宗室而受元聘遂與之絕孟頫數往候之終不得見歎息

而去無何貨其所居得錢則週人之急田亦捨諸刹惟餘田數畝爲衣食資仍謂佃客曰我死則汝主之自是無定跡吳之名山禪室道宮無不遍歷多寓城之萬壽覺報二刹疾亟時屬其友唐東嶼曰思肖死矣煩爲書一碑當云大宋不忠不孝鄭思肖語訖而絕年七十八其意謂不能死國與無後也自贊其像曰不忠可誅不孝可斬可懸此頭於洪荒荒之表以爲不忠不孝之榜樣嘗著大無工十空經一卷空字去工而加十宋字也寓爲大宋經造語奇澁莫可曉自題其後云臣思肖嘔三斗血方能書此後當有具眼識之又著釋氏施食心法一卷太極祭煉一卷謬餘集一卷文集一卷自

敘一百二十圖詩一卷與菊山詩集並行於世盧志明崇禎十一年冬蘇州府城中承天寺以久旱浚井得一函其外曰大宋鐵函經錮之再重中有書一卷名曰心史稱大宋孤臣鄭思肖百拜封其藏書之日爲德祐元年巡撫張國維刻之以傳

王維德字國輔其先太原人後徙汴自幼刻苦於學經史子集靡不精究宋末舉進士第授迪功郎主晉陵簿公餘手不釋卷秩滿愛吳之風土淳厚遂徙家焉時賈似道當朝故不復仕至元十三年元兵過江終日閉門斂跡危坐間出遇夷人於通衢輒掩面作色以歸病亟索紙筆作韻語遺家人曰死

瘞臊穢神匪我寧盍投丙丁薪乾土馨子辰字履夫淹貫羣  
籍徐子方趙子昂交薦其文行堪任館閣孫本字立章爲海  
道府幕官原字叔達爲文學掾皆以才行稱於時

盧志

元

龔開字聖予淮陰人少負才能尙氣節博學好古尤邃經術宋  
季與陸秀夫同居李庭芝幕府宋亡來居吳下節愈孤峻嘗  
作文天祥及秀夫傳吳萊稱其不減遷固居吳日與高郵龔  
璠爲忘年友時以比漢楚兩龔開爲詩文清勁古雅游戲翰

墨爲山水人物尤卓絕不凡

盧志姑蘇志合纂

龔璠字子敬宋寶謨閣司農卿漢之子漢自高郵徙鎮江宦游

久留平江又家焉宋亡士大夫居班行者例遣北上漢行至  
莘縣不食卒璠悲不自勝語其弟理曰國亡家破兄弟少孤  
不能力振門戶獨不可爲儒以自奮耶於是刻苦於學戴表  
元仇遠胡長孺皆與爲忘年交聲譽籍甚憲使徐琰辟寘幕  
下尋舉和靖學道兩書院山長當路者交薦璠宜在館閣不  
報調寧國路儒學教授遷上饒主簿再調宜春丞以浙江儒  
學副提舉致仕所著曰存悔齋藁

盧志吳縣舊志合纂

錢仲鼎字德鈞通州人徙居蘇之蒲帆巷自幼無書不讀尤潛  
心六藝在宋以詩經發解元兵渡江不復仕進棄舉子業攻  
爲古文與趙孟頫虞集龔開輩交孟頫嘗作水村圖畀之性

不喜飲惟善勸人讀書授徒於家多時俊年餘九十燈下書  
細字至夜分乃寐暇日訪親行十餘里不持杖時汪澤民爲  
本郡推官每朔旦親候於門必再拜曰先生文章行業誠古  
君子也

盧志

范霖縉雲人文正公族也元初以名儒召見稱旨授江浙提舉  
轉禮部侍郎立朝有論議氣節凌人時咸讓之因往來於吳  
遂家焉所著有歲寒橐

盧志

劉岳字公泰祖開宋神醫世居南康星子岳嘗讀書白鹿洞克  
傳家學宋季東游遂居於吳元世祖詔求南士有司以岳應  
入見詢其先世即命以奉議大夫官太醫院時稱爲劉三點

以其指點三下洞知六脉受病之源也未幾詔以其文合古  
可掌誥命改翰林學士知制誥同修國史廷議輒與議裕宗  
嗣位丐補外授嘉議大夫建昌路總管期年卒還葬於吳岳  
爲文典雅詩無寒儉態惜不盡傳惟東崖小橐行世

盧志

張德元字長卿大名入元貞二年仕爲平江路知事寓居郡城  
事母至孝大德元年以姊慧亨守節同旌表

姑蘇志

柯九思字敬仲仙居人文宗時爲奎章閣鑒書博士寵顧甚隆  
以言罷文宗崩因流寓吳中卒九思善畫竹得文同筆法

姑蘇志

鄭元祐字明德遂昌人父希遠徙家錢塘元祐幼穎悟過人於

書無所不讀時咸淳諸老猶在元祐遍游其門質疑稽隱充  
 然有得長老皆折節下之父卒移居姑蘇從學者雲集浙省  
 憲臺爭以潛德薦之以臂疾不願仕優游吳中者幾四十年  
 富貴聲利一不動其心吳人無不敬禮至正十七年除平江  
 路儒學教授一歲移疾去後七年擢江浙儒學提舉居九月  
 卒年七十三時至正二十四年也元祐兒時以乳媪失手致  
 傷右手比長能左手作楷書規矩備盡世稱一絕遂自號尚  
 左生為文章滂沛豪宕有古作者風詩亦清峻蒼古晚年自  
 彙其所作文名曰僑吳集

蘇大年遂昌先生墓誌參謝徽僑吳集序

鄭東字季明平陽人客授崑山弟采字季亮性狷介州里不能  
 容因來就寓讀四庫書晚又同寓海虞東天分絕人試有司  
 不合即棄去肆力於古歐陽元嘗薦之會病卒采亦坎壈以  
 終東文多不留彙僅存百篇采三十餘篇宋濂所敘聯璧集  
 是也東子思先字歐仲洪武中以儒士徵授國子助教遷監  
 察御史再遷福建布政卒

姑蘇志

邵光祖字弘道饒州人康節十世孫從父宦游來吳因家焉博  
 學好古研精經傳垂三十年三經皆有疑義又著尚書集義  
 六卷尤通六書之旨採諸經騷語古韻偏傍以從古文辨聲  
 音而因字母著韻書四卷其教諸生有欲習科舉者皆弗許  
 常以闢異端禁邪說扶植名教為務張士誠據吳授湖州學



正不赴以布衣終焉舊府志

王鑑字明卿真定安平人少卓異不羣及長益耿介勵名節嘗受學於虞集惟明義理適體用不以記誦詞章爲工獨喜唐人近體詩時有賦詠皆平實沈毅遊燕都朝貴交薦試侍儀司舍人鑑辭曰吾雖不敏安能爲人所役哉斂裳宵遁因父瑄爲吳縣尹謝事居吳鑑入定省出則從縉紳諸老講究經義隱居杜門二十餘年家貧無擔石儲應門獨一老婢客過輒叩隣家問酒酒至對客劇飲善談論然不及時事亦不以私干人張士誠入吳獨造廬訪之鑑每勸以仁義得民士誠嘉納嘗語人曰明卿高世士也吾之益友至正丙午鑑疾篤

士誠遣善醫診視竟不起卒年七十三無嗣士誠深加悼惜

令有司恤其家爲買地橫山葬焉陳基誌

陳樸明州奉化人至正間與弟經同游吳遂家長洲經博學有史才所著有通鑑續編尺牘筌蹄樸亦有味道編雲軒集明一

統志

于立字彥成南康人故宋名將家子博通古今學道會稽山中

得石室藏書遂放浪江湖愛吳山水清曠因寓焉張景人物傳

周伯琦字伯溫鄱陽人至正中爲浙西肅政廉訪使十七年江浙行省丞相達識帖睦爾承制假伯琦參知政事招諭張士誠士誠既降除同知太常禮儀院事士誠留之未行拜江浙

行省左丞於是留平江者十餘年

吳寬平吳錄云伯琦被留於吳張氏為造第宅於乘

魚橋北厚其廩給日與諸文士以文墨流連因亦忘歸

士誠滅伯琦乃得歸鄱陽尋卒

伯琦儀觀溫雅粹然如玉遭時多艱而善於自保博學工文章尤以篆隸真草擅名當時嘗著六書正譌說文字原又有

詩文彙若干卷

元史

謝應芳字子蘭武進人耿介尚節義作為文章咸有根柢元末

徙居吳之葑門避兵吳淞江上所至人欽其德延致恐後築

室松江之旁年逾八十歸隱橫山自號龜巢老人故以名其

集

列朝詩集

饒介字介之臨川人自翰林應奉出僉江浙廉訪司事張氏入

吳杜門不出士誠慕其名自往造請承制以為淮南行省參

政家采蓮涇上日以觴詠為事吳亡俘至京師伏誅釋道衍

曰介為人倜儻豪放一時俊流皆與交書似懷素詩似李白

光芒逼人然志大才疎而無所成為可惜也介自號華蓋山

樵亦曰醉翁

列朝詩集

張介福字子祺自懷慶徙吳中少受學於許衡二親早終遂無

仕進意家貧冬不能具夾襦或遺以紵絮不受繼介必以禮

張士誠入吳有卒犯其家危坐不為起刀斫面仆地醒復取

冠戴之坐自若卒怪以為異物走去介福恐發其先墓往廬

焉士誠聞而欲致之不可使其弟往問荅曰無樂亂無貪天

禍無忘國家饋之力辭已病革謂其友曰吾志希古人未能也惟無汚於時庶幾哉遂卒

明史

楊維禎字廉夫會稽人泰定中登李黼榜進士再轉鄉郡鹽司令以狷直傲物不調者十年因得自放歷覽東南名山水其所得盡發而為詩文自錢塘至雪川又由雪川居蘇州之錦繡坊南北弟子受業者以百數至正文體為之一變其在錢塘與茅山張雨永嘉李孝光為詩酒交在吳與毘陵倪瓚吳興郊韶崑山顧瑛為忘年友當風日晴輝雪月清霽輒命舟載酒妓挈儔侶訪瑛於玉山草堂中醉後披元鶴氅坐船屋上吹鐵笛作梅花弄殆忘人世

王志堅府志彙。志堅又曰鐵崖之寓吳盧王二志俱不

載按顧仲瑛玉山草堂雅集明言其曾住吳又張雨有鐵崖新居曰書畫船亭作詩以寄云蘇州去訪揚雄宅近水樓居似水波東府官曹知者少西山爽氣望中多臺招天上仙人鳳池養山陰道士鵝誰和涼風吹鐵笛莫愁艇子柳枝歌則楊之寓吳審矣

錢惟善字思復錢塘人至正辛巳鄉試出羅剎江賦鎖院三千人皆不知錢塘江為曲江思復據枚乘七發引用因此得名遂號曲江居士官至副提舉張氏據吳遂不仕退居吳江同川與楊維禎唱和已而移居華亭洪武初卒

列朝詩集

馬鑿字公振太倉人元季避兵松江之南園池亭榭幽闐自娛屏絕世慮日誦經史為人不事修飾樂與賢士大夫交楊廉夫深器重之長於歌詩有醉漁草堂二集

姑蘇志

陸仁字良貴河南人寓崑山為人沈靜簡默好古文詩不苟作館閣諸公皆重之稱為陸河南

夏迪字君啓吉安人元季方國珍亂以海道萬戶為行軍經歷統眾至崑山會明太祖革命遂託以山水之佳贅而居焉結屋讀書詩酒自適嘗自詠曰一劍江湖已十秋中原無復舊西周便應抱膝崑邱下肯管人間兒女羞以上崑山舊志

明

陳基字敬初臨海人少與兄聚受業於黃潛從潛游京師授經筵檢討嘗為人草諫章力陳並后之失帝怒欲罪之遂引避歸里奉母入吳教授諸生南北用兵朝廷開行樞密府起為

都事轉江浙行省郎中張士誠為太尉基參謀軍府事士誠稱王基獨諫止士誠欲殺之不果已而超授內史遷學士院學士一時書檄碑銘傳記多出其手及士誠就俘基從入京獨得宥免預修元史賜金而還洪武三年十月卒於常熟河陽里之寓舍其文詞清雅所著有夷白集尤義陳基傳參姑蘇志

董遠字仁仲天台人少以遠大自期不事家人生產精朱氏詩兼通左氏春秋至正中試有司不中遂留錢塘已入吳止天平山復寓松陵之梅花莊張士誠聞遠名奉書幣迎之遠受書返幣堅臥不起使再及門乃避地錦峯依浮圖以居吳元年徵至京師以沉默不稱旨謫居濠梁八年用薦授莆田知

縣時年六十餘以循良稱後卒於吳張景人物傳

張羽字來儀後以字行姑蘇志更本溇陽人從父宦江浙兵阻

不獲歸與友徐賁約卜居吳興領鄉薦為安定書院山長再

徙於吳洪武四年徵至京師應對不稱旨放還再徵授太常

司丞太祖重其文十六年自述滁陽王事命羽撰廟碑尋坐

事竄嶺南未半道召還羽自知不免投龍江以死羽文章精

潔有法尤長於詩作畫師小米明史

徐賁字幼文其先蜀人徙常州再徙平江工詩善畫山水張士

誠辟為屬已謝去吳平謫徙臨濠洪武七年被薦至京九年

春奉使晉冀有所廉訪暨還檢其橐惟紀行詩數首太祖悅

授給事中改御史巡按廣東又改刑部主事遷廣西參政以

政績卓異擢河南左布政使大軍征洮岷道其境坐犒勞不

時下獄瘐死明史

余堯臣字唐卿永嘉人早以文學著客居會稽越鎮帥院判邁

善卿參政呂玘羅致幕下與有保越之功薦剡交上無意仕

進於越之桐桂里治圃結茆署曰菜邁已而入吳居北郭與

高啓張羽為北郭十友即所謂十才子也十人姓名詳見吳縣王行傳啓

送唐肅序曰余世居吳北郭同里交善者惟王止仲一人十

餘年來徐幼文自毘陵高士敏自河南列朝詩傳高遜志字士敏河南人元末寓

嘉興徙吳門受業於貢師泰周伯琦鄭元祐洪武初徵修元史入翰林累遷侍讀學士建文時為太常右少卿靖難後存

歿不唐處敬自會稽明史唐肅字處敬山陰人通經史兼習陰陽醫卜書數少與上虞謝肅齊名稱會稽二肅至正壬寅舉鄉試張士誠時為杭州黃岡書院山長遷嘉興路儒學正士誠敗例赴京尋以父喪還洪武三年用薦召修禮樂書擢應奉翰林文字其秋科舉行為分考官免歸六年謫佃濠梁卒

來儀自溇陽各以故來居吳而皆與余鄰於是郭之人物遂盛矣吳亡之後與楊基徐賁同被徵謫濠洪武二年放還

授新鄭丞

列朝詩集

王禕字子充義烏人洪武間官翰林待制奉使雲南死節未仕時寓居吳淞甚久集中有吳江客中冬至及吳江別運上人

詩江南通志

李幹字貞臣睢州人仕元為許州同知後以戶部侍郎佐擴廓

軍兵敗俘置鎮江已而選入司農司議禮律官制皆預焉及建六部以為吏部郎中兼秦府相參軍名議藩封後斥居寧夏又召入為翰林待詔直內閣以老致仕來蘇依友人盛逮年八十六卒逮為買地黃山葬之幹通先代典章明國初制作議論英爽一時稱之

王賓撰傳

王彝字常宗其先蜀人父某教授崑山彝遂居於崑又徙嘉定少貧讀書天台中師事孟長文長文為金履祥弟子故彝之學遠有端委為文精嚴縝密明暢英發不逐時好時楊維禎以文章雄視東南一時多尙之彝獨目為文妖作文詆之洪武初與修元史書成以母老辭歸後與高啓俱坐魏觀事

卒姑蘇志列朝詩集彝自  
號媯雌子有三近齋橐

姜漸字羽儀諸暨人至正間僑居吳中張氏時起為淮南行中

書左右司都事未幾罷歸以著述為事洪武初徵拜太常博

士卒漸學識超詣所為文溫雅平實姑蘇志

張著字則明永嘉人元季避兵常熟遂家焉洪武初舉進士授

膚施知縣陞臨江府同知所至有治績卒於官歸葬海虞著

持行清謹鄉望甚尊其文醇正有則詩清婉得唐人句法所

著有永嘉集長安唱和集易經精義子規字運生學行能世

其家鄧志

吳福字好德鄞縣人洪武庚辰進士擢禮科給事中奉使琉球

遇颶風中貴人以下皆謀禱於海神福惟戒舟師謹檣柁而

已使回與修永樂大典尋奉使四川還拜江西按察司僉事

有以親黨被逮者三十餘家福為辨析無辜即日奏出之遷

禮部員外郎與修五經性理大全書成陞陝西右參政先是

寧夏鹽池聽民採取至是禁之福奏許其納課鹽則官量給

之民甚便焉逃民匿漢中牛山時出寇掠捕之久不息福遣

人諭降復業者三千餘人九載陞福建右布政使時科銅鑄

錢頗擾民奏以庫貯廢銅代之以年至乞致仕愛吳中山水

之秀遂占籍為吳縣人年七十卒葬烏龍山子憲性至孝母

喪過哀事庶母尤孝謹嘗以居室讓諸弟儼屋自處郡人杜


瓊贈以詩有今日重逢薛侍中之句後薦授高郵州訓導魏驥

誌參姑蘇志

朱先字後之嘉興人後授官蘇州衛因家焉起家武舉嘉靖癸巳倭犯海上先請於督撫募海濱鹽徒爲一軍自胡宗憲爲御史至總督皆倚任先大小數十戰皆先登殺倭甚衆以功授都司宗憲被逮先解官護行宗憲釋還先乃歸御史按福建巡撫王詢侵軍費檄先證之先曰先王公部將也不敢誣府主御史怒坐先萬金論死繫獄閱八年始白萬歷初用薦起圖山把總歷薊鎮南兵營叅將副總兵後數爲廣東福建總兵官以年老謝事歸復起辭不赴先爲將有膽智砥節首

公其處宗憲詢二事時論以爲有國士風明史略參王志堅傳

周天球字公瑕太倉人年十六隨父徙吳仍就州籍試補府學諸生從文徵明遊治經生業名日起年四十患奇疾遇神醫得愈卽棄諸生肆力詩文兼善大小篆古隸行楷法海內慕其書者輻輳一時豐碑大碣皆出其手都中貴人爭相延致天球反以爲慙辭歸求書翰者益多性爽邁不屑世故然內行淳備父歿與二弟分甘共暖其姑姊妹親黨寡居無依者咸藉舉火感文徵明接引設像中堂歲時奉祀年八十二卒無子以外孫施允昌爲後允昌字汝宗萬歷丙午舉人文震孟稱其篤實有隱操無慚孝廉名甫逾壯而死惜未究其學





云馮時可誌參姑蘇名賢小紀

王穉登字伯穀

明史本傳長洲人王志堅府志彙云武進人少從父居郡之山塘已而還為諸生入太學久客

京師晚得吳縣錦帆涇廢址構園其中遂家焉今從之入流寓

四歲能屬對六歲善壁窠大

字十歲能詩長益駿發有名嘉靖末遊京師客大學士袁燿

家燿試諸吉士紫牡丹詩不稱意命穉登為之有警句燿名

數諸吉士曰君輩職文章能得王秀才一句即將薦之朝不

果隆慶初復游京師徐階當國頗修恨於燿或勸穉登弗名

袁公客不從刻燕市客越二集備書其事吳中自文徵明後

風雅無定屬穉登嘗及徵明門遙接其風主詞翰之席者三

十餘年嘉隆萬歷間布衣山人以詩名者十數俞允文王叔

承沈明臣輩尤為世所稱然聲華赫奕穉登為最申時行以

元老里居特相推重王世貞與同郡友善顧不甚推之及世

貞歿其仲子士驢坐事繫獄穉登為傾身救援人以是重其

風義萬歷中詔修國史大學士趙志臯輩薦穉登及其同邑

魏學禮江都陸弼黃岡王一鳴有詔徵用未上而史局罷卒

年七十餘子留字亦房亦以詩名

明史文柙青瑣雜志穉登長子無曲字方字以諸

生入南雍受知於祭酒馮夢禎為人拘謹自好後棄舉子業專攻詩文山居二十年足不入城市蓋遜世無悔者按柙於無曲兄弟為彌甥乃記中絕口不言留以留雖有才行無足取也

管志道字登之號東溟太倉人後遷長洲隆慶辛未進士授南

京兵部主事時衛卒苦貢艘志道言於尚書裁去三百餘艘

攤江濟兩衛以蘇四十衛之困憂歸服除補刑部張居正奪情議起修撰沈懋學檢討趙用賢詒書具疏皆與志道商訂而後發明年大婚禮成志道疏陳九事首言太祖既革丞相事權分屬九卿正統初始用閣臣預政官府之間壅蔽請復午朝之制朝廷有大事閣臣與九卿面決又請永除言官之廷杖居正見之大恚然其詞直無可罪因計志道疏中所陳憲綱欲明舊制司道與御史抗禮且得互相糾察度御史勢重必不受遂出志道廣東僉事分巡南韶比至果為御史劾去蓋受居正屬也久之以言者復原官仍致仕志道短小有口辨少為諸生督學耿定向授以學又與羅汝芳王璧輩討

論自謂有得於中庸明哲之義所著述凡數十種閱博辨析

大指在以西來之意密証六經以東魯之矩收攝二氏議者

謂其以墨亂儒焦竑語參錢謙益狀子珍字席之以字行萬歷間以貢

授松江府訓導遷國子監典籍轉助教嘗三上疏言事卒於

京珍少傳家學尤邃於易善諧謔以東方朔自比云先賢圖傳

趙宦光字凡夫太倉人祖汴舉鄉試第一成進士父樗生亦隱

士宦光少入貲為國子生豪華自喜中歲折節讀書不肯蹈

常襲故廬居寒山親墓旁手闢荒穢疏泉架壑儼如圖畫一

時勝流爭造焉所著書幾數十種尤專精字學說文長箋其

所獨解也篆書亦精絕妻陸氏尚寶卿師道女博學能詩文

爛婦德或比之鹿門偕隱而詞章翰墨遠出夫上子均字靈均有志節從父傳六書之學又從燕山僧見林授大梵字并諸字母移日分夜父子自相講習遂得其精

文震孟錢謙益二傳合纂

王醇字先民江都人早慧好讀書然不樂為經生言工為詩規摹少陵王孟之間其得意處不減古人文宗六朝雕鏤藻繡符於自然為人煦煦泛愛而涇渭了然生平澹於名利然終日與名利人接亦無忤也晚讀佛書有所悟斷欲長齋手書大乘諸經凡數百卷久寓吳中遂欲卜居而不果天啓丁卯

卒於揚州有寶藥栖詩

王志堅府志彙

范洵字東生烏程人徙居吳門鑿池種竹攻苦讀書沈酣唐人

之詩諷詠其清詞麗句苦吟精思寢食盡廢引洞庭吳鼎芳為同調務盡刊甘醲肥厚獻酬傭僱之詞視餘子茂如也家貧落魄出游閩滇搜剔名勝垂橐而歸萬歷之季操黨議者多出茗甞間洵與之相抵牾一時詞客不為洵許可者希貴人旨羣噪洵以此重困憤懣不得志輯全唐詩千餘卷抵手瘞足迄無寧夕咯血數升以卒年四十四鼎芳定其詩四卷而序之以為不傍古不緣今不拘律不適耦簡練純粹益神

於法者

列朝詩集

程嘉燧字孟陽休寧人僑居嘉定工詩善畫與通州顧養謙善友人勸詣之乃渡江寓古寺與酒人歡飲三日夜賦詠古五

章不見養謙而返崇禎中常熟錢謙益以侍郎罷歸築耦耕堂邀嘉燧讀書其中閱十年退休寧遂卒年七十有九謙益最重其詩稱曰松圓詩老

明史

宋珏字比玉莆田人少得程嘉燧荔枝酒歌行求七年以兄事之能詩畫時來虞山與錢謙益瞿式耜諸人遊為人豪爽八

分書特為精妙

錢陸燦  
常熟志

吳拭字去塵新安人好讀書鼓琴做易水法製墨遇通人文士倒囊相贈富人厚價購之輒大笑曰勿以孔方兄辱我客卿也坐此益大困落魄遊吳門遇亂死虞山舟中毛晉為收葬

之

列朝詩集

程智字子尚號雲莊休寧人少學舉子業不喜弱冠後讀易有省徒步至河南謁伏羲陵歸入山中晝夜窮究天啓中來吳與浮屠法藏講論深相契合以其終非正學復還入山精研易理遂大悟作易源流深明極數辨物之道崇禎間復來吳講學從游甚眾順治八年年五十卒葬於陽山所著有論孝書大學詳說大學定序中庸旨易學要語十六年吳人請之巡撫配享二程夫子祠弟子傳其學者湯祖祐字耿遙袁徵字公白俞榮字授子何正渠字剛中華渚字方雷蔡方熿字涵之皆有名於時

本湯祖祐  
易師年譜

姜埰字如農萊陽人崇禎四年進士授密雲知縣調儀真遷禮

部主事十五年擢禮科給事中與行人熊開元俱以建言激  
帝怒下詔獄拷訊欲殺之既又怒刑官擬罪徇情奪尙書徐  
石麒等官逮塚開元至午門並杖一百塚已死塚弟塚口含  
溺灌之乃復蘇仍繫刑部獄十七年正月大學士李建泰督  
師討賊臨行以塚開元二人請始釋塚成宣州衛將赴戍所  
而都城陷福王立遇赦起故官以父艱不赴國變後流寓蘇  
州自稱宣州老兵亦曰敬亭山人康熙癸丑年六十七將死  
語其二子安節實節曰吾奉先帝命戍宣州死必葬我敬亭  
之麓二子如其言門人私謚貞毅先生塚字如須崇禎十三  
年進士授行人塚下獄塚盡力營護後聞鄉邑破父瀉里殉

難一門死者二十餘人塚請代兄繫獄釋塚歸葬不許卽日  
奔喪奉母南走蘇州初塚爲行人見署中題名碑崔呈秀阮  
大鍼與魏大中並列拜疏請去二人名後大鍼得志怨塚兄  
弟必欲殺之塚避至徽州塚變姓名逃之寧波避跡台宕間  
之佇石山久之復俱來吳年四十先塚卒門人私謚貞文先  
生康熙二十四年吳人建萊陽二姜先生祠於虎邱塚子安  
節奉遺命居宣城守墓實節與塚子寓節留吳守祠安節字  
勉中有篤行實節字學在工詩畫晚營生壙於虎邱以父母  
未得合葬不敢以妻祔寓節字奉世年十二侍父疾卽斷酒  
肉居喪哀瘠逾成人繼母病偕妻剗臂肉以進及歿幾至滅

性生平篤師友之誼初垓會試出徐沂之門沂子枋隱山中常瀕於飢寒寓節月有饋問給其不足寧都會傳燦僑居吳而客死於燕有妾生子女五人煢煢無倚寓節割宅處之而撫其孤蜀人唐甄以縣令落職寄居吳寓節時賙卹之四方遺民來吳者常主其家卒之日吳人諡之曰孝正

志

明史參舊府志新縣

鍾曉字人雅或曰淳崖不知何許人崇禎末流寓崑山混跡駟僧屢易姓名食無一飽而行吟不輟見墻壁墜粉輒以所作題擘窠書人爭惡之夏日沈飲大醉溺水死葉方藹錄其詩百篇謂風神絕俗比於初日芙蓉云

崑新志彙

劉永錫字欽爾魏縣人少負奇節通象緯兵農之學崇禎丙子舉於鄉甲申春知北方將亂欲避兵江南就選長洲教諭挈家南下既至日與諸生講道德明忠孝之節嘗署崇明縣事三月庭無留獄國變後隱居陽城有大吏遣門下士說之出永錫拔劍欲自剄其人大駭而去草衣敝屨以葛巾蒙其髮日坐土室中北向涕泣妻子織蒲席葦簾以食有女年及笄未嫁知父義不北歸而舅家相去二千里恐身無所託貽親憂遂絕粒死妻栗氏哭之慟亦死遭大水乏食家僮十餘人相繼餓死已遣子臨與婦歸魏臨既歸假貸得百金亟欲馳獻父中路墮馬死永錫乃嘆曰女死貞妻死慈子死孝天之

報我亦厚矣獨居士室中不蔽風雨好為詩歌音節悲壯讀者為之歔歔甲午秋病劇大呼烈皇帝三而卒弟子徐晟陳三島等葬之於虎邱山塘

陳濟生啓  
禎遺詩傳

本朝

○陳瑚字言夏號確菴太倉人博通經史兼精律歷兵農之學崇禎壬午舉於鄉明亡奉父隱居崑山之蔚村力耕以養村田窪下導鄉人築堤捍水歲獲豐稔立孝弟力田為善三約眾皆悅從嘗徙居常熟之隱湖後往來四方晚年又移雙鳳游其門者多俊偉英略之士虞山錢謙益以其盛比河汾焉卒年六十三門人私謚安道先生蔚村人立祠祀之巡撫湯

斌即其故居建安道書院

湯來賀誌參鎮洋新志及陳遜所述行實

○張拱端字孟恭父度昭勇將軍太原人官於吳樂其風土因家焉拱端聰穎絕人過目成誦為諸生好奇任俠遊楊廷樞徐汧之門後應辟授職方主事國變後逃於禪易名與機以其學授二子七女皆工詩善畫築別墅虎邱棲隱其間晚失明年九十餘卒有孤雲集

元和縣志

○喻昌字嘉言新建人崇禎中以選貢入都上書憤欲有為卒無所就順治初常熟錢謙益邀至邑中昌少遇異人授內養法遂終身不臥明禪理精醫藥所至活人又好奕年八十餘與國手李元兆對奕三晝夜斂子而逝所著有尙論篇醫門

法律寓意草等書行世

錢陸燦  
常熟志

○沈祖孝號雪樵初名果字因生烏程人爲諸生有聲鄉先達

溫體仁慕其才訪之拒弗見及體仁入閣祖孝嘆曰宵人秉

政國事必債矣後如其言順治中隱吳江之嚴墓村與吳宗

潛等結社賦詩性耿介不苟卒以窮死同時有友丹生字彤

寶嘉興府諸生國初避居吳江與朱鶴齡包振願有孝等

爲詩友著述甚富

舊府志參葉  
變吳江志

○顧祖禹字景范世居無錫宛溪隨父柔謙徙常熟父歿寓釣

渚渡依范鼎九後居膠山黃守中家祖禹博極羣書尤精地

理之學好遠遊足跡幾遍天下迄無所遇歸而閉戶著書成

讀史方輿紀要一百三十卷其書於都邑形勢山川險要歷

代戰守事蹟以至河渠水利皆能上下古今貫穿精密有裨

考鏡前此所未有也與寧都魏禧交最善禧嘗言吾之文雖

爲海內所推求實學如顧景范萬充宗輩則瞠乎其後南昌

彭士望服其爲人走數千里挈其子厚本師事之晚客都門

崑山徐乾學奉詔纂修一統志延請祖禹主其事乾學欲

薦之朝出矢言謝乃止歿後子孫衰落其方輿紀要一書以

卷帙浩繁僅有鈔本無人能付梓者

金匱新志  
參魏禧集

○吳彥芳字友聖長樂人順治壬辰進士授中牟知縣丁繼母

憂不能歸里寓山陰旣而遷於蘇服旣闋無意仕宦徜徉山



水以觴詠自喜閩撫范承謨將迎之以歸未幾范殉耿逆之難彥芳遂終於吳

江南通志

○李仙根字子靜遂寧人父實明末為長洲知縣後棄官隱吳淞仙根侍父來吳遂占籍長洲順治甲午仍舉四川鄉試辛丑殿試第二授編修遷司業康熙七年安南王黎維禕與部統使莫元清構怨元清失土來歸

上命仙根持節往諭歸元清故土維禕初不奉詔往復辨論仙根執其通使大臣付之吏致書維禕曉以大義又以其國事決於鄭輔國并移諭輔國卒令還莫氏高平土地還朝備奏始末并進所撰使事紀要

上大喜獎勞甚至進祭酒陞內閣學士吳三桂叛命仙根協理兵餉駐荊州坐事降補鴻臚卿尋遷副都御史戶部右侍郎歷三歲以錢法事被議罷歸戊辰再補光祿少卿後又坐失儀降調卒於京仙根有經濟才立朝以勿欺自矢在部院時持論侃侃所裨益甚多詩文駘宕婉折書法道逸顧以屢起屢躓未究其用人多惜之

○汪九漪字紫瀾休寧人少為諸生遊學江西晚寓常熟博學好深沈之思尤喜邵子皇極經世書研精三十餘年以為祝秘發邵子之覆而其說多異同亦有異於邵子而不相背者乃原本廖氏算由聲音起參祝氏之說闕疑訂定演繹敷陳

布圖系解錯綜經緯歸於三才理數自然冥合以開究萬事  
又著七音類集立誠書雪中集述梅圃詩文共若干卷平生  
論學以心得為宗卒前九十日能自言其期孫應銓字杜林  
康熙戊戌殿試第一官至贊善

昭文志

○唐甄字鑄萬達州人父階泰明末為吳江知縣蜀亂不得歸  
遂家於吳甄少嗜學狀貌短小而剛直亢爽順治丁酉舉四  
川鄉試授長子知縣有善政甫十月以逃人誣誤去官僦居  
吳市蕭然四壁炊烟時絕著述不輟其學以良知為宗貫穿  
經史非秦漢之書不讀所著衡書九十七篇志在權衡天下  
後以連蹇不遇更名潛書寧都魏禧極稱之其壻王聞遠刻

以行世又有毛詩傳箋合義春秋述傳潛文潛詩日記若干

卷

王聞遠唐  
圃亭行略

○沈荀蔚字豹文太倉人父雲祚明崇禎十五年以進士知華  
陽縣張獻忠陷成都雲祚罵賊死荀蔚方八歲與母妹及舅  
張士偉逃匿邛州洪雅山谷間數遭劫奪至雅州父友監軍  
道范文苾見而憐之送居乾壩陽而檄士偉署洪雅縣事未  
幾士偉卒士曾葛祐明作亂復入八面山中潛匿不出初避  
賊時士偉於敗甲中得殘編以課荀蔚由是遂通文藝久之  
以睢州籍應試補諸生誦讀之暇追憶往事博採傳聞作蜀  
難紀略後母歿妹嫁彭城趙氏子然一身飄泊無所嘗赴友

人約至天全土司又遭高承恩之亂竄逐懸崖絕壑間屢瀕於死順治十六年大兵下川東道稍通乃至成都求父遺骸不得慟哭而還已遇金陵彭文煒自保寧通判遷襄陽知府挈以行過新灘舟沈又幾死至康熙四年夏始得歸時大父母長兄皆久歿因母黨遂家於吳初雲祚死節傳聞異辭至是荀蔚出所撰蜀難紀略并范文苙所作傳上之史館乃得列於明史荀蔚以覆巢孤童流離兵燹出萬死一生中卒能表揚先烈以學行顯於時人無不重之者

本自撰蜀難紀略及楊繩武傳

合纂

○戴易字南枝山陰人慕嚴子陵之風賦釣臺詩數百首來吳

門年七十餘矣蒼顏古貌幅巾方袍談論娓娓喜吟詠能作徑丈八分書與楊无咎善又因无咎與徐枋定交枋臨歿以書招无咎易偕至无咎為撫其孤孫而易賣字為枋營葬常冬月衣葛終日不再食積連歲賣字金卒葬枋於真如塢時人義之後歿於虎邱

元和新志參潘耒傳

○方殿元字蒙章番禺人僑居蘇州康熙甲辰進士知江寧縣改郟城皆有惠政引疾歸吳卒殿元邃於學能以經術飾吏治所著環書上下篇講性命之學卓然成一家言詩文皆有原本尤長於樂府有九谷集若干卷子朝字東華太學生幼病目遂謝舉子業肆力詩古文所作多超詣行草亦疎宕可

愛事親孝待兄弟友愛篤於交誼能賙人之急卒年六十

吳縣

新志參  
李果傳

○王材任字子重黃岡人禮部尚書澤弘子康熙己未進士官

至左僉都御史初澤弘自金陵來游常熟樂山水之勝遂命

材任卜居焉晚歲杜門與詩人王譽輩結社倡和詩文信筆

皆清真樸老不事雕飾僑居三十餘年家益困年八十七竟

以窮餓終所著尊道堂集若干卷

○施何牧字贊虞一字覺菴崇明人康熙乙丑中會試戊辰成

進士授中書舍人累遷考功員外郎風裁峻整人不敢干以

私壬午主貴州鄉試得人最盛以老乞歸卜居郡城東南之

顧氏園卽明吳文定東莊也疏池補石藝花種竹與一二故

人及浮屠相往來詩歌唱和間以圍棋優游二十餘年年八

十二卒嘗輯韻雅宋人梅堯臣陸游詩集及明詩去浮行世

所著一山詩集屢易其橐近體有錢劉風

李果施  
考功傳

○周篆字籀書其先青浦人父禮徙烏程篆復遷吳江嚴墓少

穎敏好學能爲詩古文弱冠後問道於顧炎武炎武告以學

須務本遂博究經史已而遍游南北參文武幕府於所在河

渠兵農錢穀之事益加諳練凡所述作皆切中當時利弊年

六十五歸里尋卒所著有草亭集及蜀漢書杜詩集說子廉

字來叔善詩有匏園集

震澤  
新志

○楊賓字可師山陰人少穎悟八歲能作擘窠書及長以刑名經濟之學歷佐大吏幕好著述兼善書法才高氣豪名重一時初賓年十三父春華坐友人累偕妻流寧古塔康熙己巳聖祖南巡賓偕弟寶迎叩御舟請代父戍不許遂至寧古塔省親途中墮馬幾殞及父歿於戍所復詣闕泣請歸骨而格於例遍訪舊案久之始獲一卷以請部議從之乃迎母奉父柩葬於蘇州遂家焉卒年七十一所著有晞髮堂詩文彙存疑錄客舍鈔存柳邊紀略金石源流藩鎮考日富編題跋偶筆等書節吳縣新志

○朱襄字贊皇無錫人八歲有詩名能作擘窠書時日為神童

弱冠游京師館於諸王王自號紅蘭主人酷愛襄詩酬唱成帙海內名人皆樂與游兼精易理所著有易章十二卷漫與集集唐詩晚年僑寓於吳以卒約吳縣新志

○張遠字超然侯官人幼孤苦力學避耿精忠亂來遊常熟為何氏贅壻遂家焉詩文書翰匠心獨運自有遙情逸氣人亦頽然天放遊四方所交皆當世名人高士康熙己卯舉福建鄉試第一授雲南陸豐知縣卒於官所著有無悶堂集四十卷昭文志

○吳瞻淇字漪堂歙縣人國子祭酒苑次子僑居蘇州康熙癸未進士選庶吉士甫兩月因念母即請假歸食貧自守不與

戶外事母歿後遂不復出少從兄瞻泰學終身事之惟謹急人患難不計有無為詩敦厚和平用意在言外有柏羅山人

集

本李果二  
吳先生傳

蘇州府志卷第六十七

蘇州府志卷第六十八

列女一

列女一類范盧王三志紀載寥寥舊府志漸多矣雍正乾

隆以來

朝廷陶淬風化廣頒

旌典每歲貞節婦女以年例獲旌者至於不可勝紀然僻壤窮

簷晦而不彰者又未必無也今仿姑蘇志例凡行事實有

可紀與夫遭變捐軀者不論旌否並按時代編列其事跡

畧同及年遠無徵者亦各存姓氏於後

吳縣

漢

陸續母

詳見續傳

吳孫奇妻者廣陵范慎女名姬年十八配奇一年而姬亡慎以姬少寡無子迎還其家姬不肯歸迎者以父母命迫之姬遂操刀割耳及鼻曰父趣我者不過以我年少而色美今已殘矣行將焉如於是迎者空返

列女傳

吳許升妻者呂氏之女也字榮升少為博徒不理操行榮躬勤家業以養其姑數勸升脩學每有不善輒流涕進規榮父積忿疾升乃呼榮欲改嫁之榮歎曰命之所遭義無離二終不肯歸升感激自勵乃尋師遠學遂以成名尋被本州辟命行

至壽春道為盜所害刺史尹耀捕盜得之榮迎喪於路聞而詣州請甘心讐人耀聽之榮乃手斷其頭以祭升

以上後漢書

餘姑亡夫族多欲聘之誓不再嫁黃巾賊陳寶欲干穢之榮執節不聽踰垣而走賊拔刀追之曰從我則生不則死榮曰義不受辱寇遂殺之是日疾風暴雨雷電晦冥賊惶懼叩頭謝罪乃殯葬之麋府君遣主簿祭之又出錢助縣為冢於嘉

興耶里墟北名曰義婦坂

以上范盧二志引列女傳

二貞婦者公孫達妻郤李公謀妻戴各遭寇賊臨之以刃曰寧為我妻而生乎將不從而死乎二貞曰婦人以貞淑為節豈可畏死而忘行耶賊遂殺之

列女傳

沈伯陽妻顧文宣之女字昭君早寡無嗣盡禮供養其姑父陰以許人姑聞而哭昭君驚惶問姑姑以告昭君泣曰妾聞婦女以專一為貞回貳之行非所聞也乃割耳剪髮以明己志

列女傳

三國吳

張溫姊妹三人皆有節行為溫事已嫁者皆見錄奪其中妹先適顧承官以許嫁丁氏成婚有日遂飲藥而死吳朝嘉歎鄉人圖畫為之贊歎云

文士傳

張白妻陸氏績之女績於鬱林所生名曰鬱生適張溫弟白姚信集有表稱之曰臣切見故鬱林太守陸續女子鬱生少履

貞特之行幼立匪石之節年始十三適同郡張白侍廟三月婦禮未卒白遭罹家禍遷死異郡鬱生抗聲昭節義形於色冠蓋交橫誓而不許奉白姊妹窵巖之中蹈履水火志懷霜雪義心固於金石體信貫於神明送終以禮邦士慕則臣聞昭德以行顯行以爵苟非名爵則勸善不嚴故士之有誅魯人志其勇杞婦見書齊人哀其哭乞蒙聖朝斟酌前訓上開天聰下垂坤厚褒鬱生以義姑之號以厲兩髦之節則皇風暢穆士女改視矣

裴松之吳志注

晉

張茂妻陸氏吳郡人茂為吳郡太守被沈充所害陸氏傾家產



率茂部曲為先登以討充充敗陸詣闕上書為茂謝不尅之責詔曰茂夫妻忠誠舉門義烈宜追贈茂太僕

晉書

許邁妻散騎常侍吳郡孫宏女也邁總角好道立精舍於杭懸溜山往來茅嶺惟朔望時節還家定省父母既終乃遣孫氏還家為書以絕之曰欲聞懸溜之響山鳥之鳴以為簫韶九成不能勝也寓景青葱之下栖息巖岫之室以為殿堂廣廈不能過也情聽所終志絕於此吾其長別離矣孫為書荅之曰愚下不才侍執巾櫛榮華福祿相與共之如何君子篤其大義輕見斥逐若以此處遐曠非婦人所便昔梁生陟嶺孟光是攜簫史豈樓秦女不舍衛人脩義夫婦同行老萊逃名

伉儷俱逝豈非古人嘉遯之舉者許君乖離矣

盧志按真諱邁小名映吳

郡孫宏字彥達女即驃騎秀之孫既離好無子歸宗據此則是富春人

張林妻徐氏者案張林碑曰夫人姓徐吳郡人柔惠清順中和

聖善婦德既備母道亦踐志厲冰玉厥德丕顯靡靡其操翼

翼其仁明景內映朗節外新其嫩風邁淑謹其身

范志

王氏五女吳縣西洞庭人事父賢孝俱未適人父卒各以衣負

土成塚旦夕繞墓悲號死時人哀之因名五女墳

震澤編

宋

顧琛母孔氏大明初琛為吳郡太守免官停家孔氏時年百餘歲晉安帝隆安初琅邪王廞於吳中為亂以女為貞烈將軍

悉以女人為官屬以孔氏為司馬及孫恩亂後東土飢荒人相食孔氏散家糧以賑邑里得活者甚眾生子皆以孔為名焉泰始初卒

宋書

張冲母戴顯女有儀範張氏內則取焉

南史

范法恂妻褚氏吳郡人勤苦執業宋昇明中孫曇瓘謀反亡命褚謂其子僧簡曰孫越州先姑之姊子與汝父親則從母兄弟交則義重古人逃竄脫不免汝宜收之曇瓘尋伏法褚氏令僧簡往斂葬之年七十餘永明中卒僧簡在都聞病馳歸未至褚已卒將殯舉尸不起尋而僧簡至焉

南史

齊

韓蘭英吳郡婦人有文辭宋孝武世獻中興賦被賞入宮明帝

世用為宮中職寮世祖以為博士教六宮書學以其年老多

識呼為韓公

齊書武穆裴皇后傳 隋書經籍志 梁有宋後宮司儀韓蘭英集四卷亡

梁

張稷長女楚媛適會稽孔氏無子歸宗稷為青冀二州刺史州

人徐道角等夜襲州城害稷女以身蔽刃先父卒

梁書

張氏女顏氏家訓曰思魯第四舅母親吳郡張建女也有第五妹三歲喪母靈牀上屏風平生舊物屋漏霑濕出曝曬之女一見伏牀流涕家人怪其不起乃往抱持薦席淹漬精神散怛不能飲食將以問醫醫診脉云腸斷矣因爾便吐血數

日而亡中外憐之莫不悲歎

按思魯之推之子其事當在梁時舊志編列宋時非是

宋

朱億女郡人也淑行婉質工琴書至道初裴愈奉使兩浙聞其才藝奏之名至京師既入宮掖賜號白蓮花夫人後出俗刺血書蓮花經一部改賜慈濟廣惠大師億子光祿卿公綽之女二十娘子嫁朝請郎李防亦聰慧作混元圖贈宜人

陳質妻長安縣君丁氏晉公謂之妹博士之奇母也謂欲官二甥丁固辭俾自以學術進謂竦然稱歎之奇兄弟繼登科鄉里稱爲賢母胡瑗著丁氏賢惠錄蘇舜欽書之里人張紳世與陳舊其婦晚而歿丁裸其嬰歸付乳媪親加撫視能言而

還之謂旣南謫家日淪困有姪孫女幼孤丁訓養甚厚及歸馮氏子婦式嫻熟甚宜其家知州黃宗旦聞之曰茲事可書於史贈孝感郡太君

龔氏宗元女嫁德化知縣福州李處道讀書通六義賦詩書字皆過人晚喜佛書嘗問法於圓照禪師宗本因名曰守安處道年高而宦不達龔能安之元符三年卒年六十四葬武昌子抗抗弟援篤學有文龔所親教由進士爲武昌尉

鄭絳妻錢氏廣陵王之元孫也幼秀悟旣歸絳姑御家嚴錢氏時起居惟敬無故未嘗去左右姑疾嘗藥不解衣者半年絳貧赴官陝右不能具行裝其姊自京師持金幣遺之甚厚錢

氏不啓封謝而歸之退而曰身受姊賜固可抑何以全吾夫之廉乎靖康初卒

按姑蘇志載宋時李氏女能詩錄其破錢詩一首考夢溪筆談乃毘陵女子非蘇人也故去之

張弼妻徐觀妙直秘閣閔中女也建炎三年金兵犯揚州官軍奔潰肆掠執徐欲污之徐瞋目大罵曰朝廷畜汝輩以備緩急今敵犯行在既不能赴難反乘時爲盜我恨一女子不能引劍斷汝頭以快衆忿寧肯受汝辱以苟活耶賊刺殺之投江中而去弼歷陽人也以上俱盧志

何氏吳人吳永年之妻也建炎四年春金兵道三吳官兵遁去城中人死者五十餘萬永年與其姊及何奉母而逃母老待

扶持而行卒爲賊所得將繫其姊及何何紿謂賊曰諸君何不武耶婦人東西惟命耳賊信之行次水濱何謂其夫曰我不負君遂自投於河其姊繼之宋史本陳長方二烈婦傳

劉士英妻陳氏居父母家建炎之禍被獲赴井死士英字仲發武寧人靖康初通判太原與金人戰被執罵賊不輟死盧志按

士英宋史有傳

祝磯妻徐氏郡人侍郎林之從姑一云林之妹通判壽之女敏慧能

詩孫觀以爲不類婦人女子所爲其筆墨哇逕多出於杜子美而清平沖淡蕭然出塵自成一家人賦尤工有閨秀集二卷傳於世稚山嘗侍夫人坐有言太素脈類妖妄者夫人徐

曰醫和祝晉侯之疾而曰良臣將死天命不祐非太素朕子其學識明辨類如此磯處州人也盧志

沈清友姑蘇女子能詩有云晚天移棹泊垂虹閒倚蓬窻問釣翁為底鱸魚低價賣年來朝市怕秋風甚得風人之體又詠

漁父云起家紅蓼岸傳世綠蓑衣詠牧童云自便牛背穩却

笑馬蹄忙其下字之工如此隨隱漫錄

王埜母鄭氏吳郡人埜以父介蔭歷官浙漕忤權貴丁大全嘗

被論埜以母年老託言改除母曰我已知之昔汝父以忤時

相去國汝又如此我方喜耳何憂

元

趙淑儀

吳縣趙夢炎女清獻公抃之裔孫也夢炎臥病時年七

十餘家貧無醫藥資淑儀年十八乃焚香禱於天封股以進

父患尋愈大德中里社上於總管董章製孝女歌書綵障表

其門仍贈錢帛豚酒姑蘇志

盧廷瑞繼妻周氏名妙寧其先自彭城徙吳年十九歸盧視先

配所生恩踰己出廷瑞為江浙行省屬官臨安一嫗為人鬻

金珠偶失無償將殺身以自明哭泣過市周聞而哀之願脫

簪珥為償廷瑞乃代輸其價嫗得無死事聞於省皆稱其賢

鄭元祐傳

宋无妻趙氏年十九歸无家儉事二親孝謹嘗封股灼臂禱其

疾佐无成家不少怠喪葬大事成藉氏力年七十四先无卒

宋无  
自志

后載妻失其氏載為郡吏至正丙申行役京口妻年三十姿色

姝麗生一子一女城陷先屬子女於姻謂所親曰吾夫在遠

而罹此大變或不幸被强辱雖欲死不可得矣寧捐軀以全

吾志語未絕兵入妻赴水矣

姑蘇志

廣平路總管浦源子玉田妻梅氏郡人至正十六年淮兵破城

梅氏匿旁小民家兵入夫逸去梅氏為兵所得見其色將汚

之梅氏探懷中金與之乘閒赴水水淺不得溺兵至水次以

刃擬梅氏梅氏不為動兵舍去後至者見婦面水上知其生

復欲鈎出之力挽不肯升兵怒以戈搯其腋死

高啓傳

楊椿妻王氏吳人張士德寇郡椿戰死氏被髮徒跣冒鋒鏑尋

尸三日得於張香橋下輿歸葬之與子女二人同日卒詳見

椿傳

七姬者段氏程氏翟氏徐氏羅氏卞氏彭氏皆江浙行省左丞

潘元紹妾元紹戰將敗七姬皆縊死

互見塚墓

擔夫婦家郡城不知其姓氏夫在公庾為擔夫張氏時應募出

充戰士丁未六月戰死於城西門婦號泣城下得其屍解衣

拭之斂於棺哭盡哀既焚收骨裹以帛仰天大慟身與骨俱

投於水

姑蘇志

劉節婦泰州坂埭人至正丙申隨父渡江居吳門適張士誠部將曹某方數月夫陣亡劉不避凶險躬至死所求其屍歸葬

欲以身殉父不許既而權貴人聞劉美且賢欲強委禽焉劉

誓死不貳遂削髮為比丘尼

輟耕錄

鄭允端字正淑宋丞相清之後居吳中號花橋鄭家嫁同郡施

伯仁能詩文嫻內則至正丙申妖兵據城家為盜所破年三

十得疾而卒宗族私謚曰貞懿有集曰肅雍自為之序

杜寅傳

薛蘭英蕙英吳人皆聰明秀麗能賦詩建一樓以處曰蘭蕙聯

芳二女日夕吟詠不輟有詩數百首顏曰聯芳集楊鐵崖製

西湖竹枝曲和者百餘家見之笑曰西湖有竹枝曲東吳獨

無竹枝曲乎乃效其體作蘇臺竹枝十章楊見其稿題一詩

於後自是名播遠邇

列朝詩集

明

張槩妻金氏名淑寧吳人德儒先生之女年二十二嫁槩洪武

十九年槩得罪吏具辭將寘於法淑寧聞之曰吾雖歸張未

及朞月義不可使夫獨死死於夫死之後孰若死於其前遂

經死後三月槩得宥天台林右作張烈婦傳

姑蘇志

史景忠妻鄒氏年十八嫁景忠未幾景忠謫戍大寧鄒與其姑

及一女在行洪武丙子寇發大寧城中有欲犯鄒者鄒不從

脅以刃鄒嚙齒罵延頸受刃竟被殺時年二十一

張和傳

蔡氏隱士韓弈妻讀書通大義善筆札嘗書經典梓行舊府志

吳氏者廬江人陳汝言妻居船塢巷汝言死子繼生纔十月吳

守節教子有司上其節孝成祖命御史廉之無所聞御史因

遣一人為丐者賃居隣空室日伺之寂如忽一日吳令繼於

後園鋤地吳自攜飯餉之置園門外地土即掩其門繼以母

所置不敢徑取乃跪而食焉御史即以實奏上嗟異以為有

禮詔旌門年八十六終王志堅傳

盧本立妻王氏居越來溪上本立早世王撫孤士誠織紵自食

禦外侮舉三喪歷五十一年卒士誠又早歿媳朱氏與姑同

志鞠孤曰紀曰綱成立其孫雍襄並成進士沈周王志堅傳合纂

顧氏名妙明知州均義女均義好談忠節常以古賢淑訓之妙

明日此亦人耳均義喜曰女志有在矣嫁杜王玉家市中顧

為婦言笑聲不過隣壁子瓊生逾月玉卒顧盛年罷容飾惡

衣食紡績以養舅姑舅亡姑病瘼侍湯藥者六年瓊長令從

陳繼學夜執女紅與其燈火讀書瓊以學行為名儒里有病

革者屬其妻學杜節婦其妻感之不再醮正統四年知府況

鍾奏旌其門卒年八十四陳繼傳

于得泉女許贅徐景仁未婚而景仁以罪坐劓景仁父以子殘

廢欲已婚得泉甚悅女不從曰彼初非殘者竟成婚事夫甚

謹後數年景仁以前事成雲南其弟子祿謂曰若他適可免



否則死萬里矣氏曰此何難遂自經死姑蘇志

陸氏子以吹笛爲生其妻田家女也陸病久女歸父家求升粟

還陸已死女哀哭祭畢遂自經於夫尸之旁姑蘇志

王妙鳳東洞庭人許嫁吳奎奎母有淫行不欲行母不許妙鳳

歸吳以禮自將奎常商於外妙鳳獨與姑居一日姑與所私

飲并欲汚之計不可得姑命妙鳳取酒乃挈瓶不進從爨室

舉燎火警之不去復入戲紵其臂妙鳳憤極拔刀斫臂不殊

再斫乃絕父母欲訟之官妙鳳曰死則死耳豈有婦訟姑理

耶逾旬卒里人白於縣縣梗姑婦之議寃不獲伸杜啓人物志明史有

傳

曹順妻葉氏東洞庭人景泰中順死旅邸舅姑欲改嫁不從復

強之一夕自經簷下明日其夫骸骨適歸遂合葬焉震澤編

葉芸妻鄒氏嫁僅兩月芸卒鄒毀容誓死不出房限不見男子

姑曰如火盜疾病何鄒曰火至委軀煨燼盜至則先自刎疾

聽其死不得令醫診察年逾六十卒遺命就殯於室母受親

戚男子弔夜半舉柩母令人見姑蘇志

張氏名妙微河南僉事存誠女八齡隨父任南京助教道遇寇

掠露刃加父妙微以身蔽之寇不忍害編脩諸質時攝監丞

事聞女孝行遂聘爲子景通婦既娶景通死妙微年二十四

誓不再嫁撫子祥課之成業後以歲貢官曹州同知吳寬誌

葉氏女東洞庭人幼有志操聘於周氏周子無行葉泣曰忍以此身自污耶誓不與成禮久之周子死父母欲嫁之又哭曰忍以一身許二姓耶乃祝髮為尼又賀氏女聘於張將成禮夫卒衰服往哭持喪三年不肯歸久之亦為尼與葉並居寒山庵自力衣食戒行凜然年皆八十餘終

震澤編

鳳傳

汪起

張氏都御史毛瑄妾也年甫二十瑄卒將殮張抱棺碎首流血求殉親衆持之得不死既殮入臥內給從者出閉戶自經衆毀戶救解瑄尚有張沈二妾泣語之曰汝盡矣奈我兩人何張不得已乃剪髮登樓足不履地者四十餘載後膺旌典

以終其身 王志堅傳

胡氏淑寧年十九許嫁楊皓皓商外十七年不返淑寧不嫁已計聞泣曰命矣夫求婚者接踵父祖強之堅不從恪守志節

王志堅傳

顧氏長洲顧睢女年十七適劉嘉緒嘉緒負才早卒遺孤穉孫甫四月投繯僻所姑急救甦諭以親老子幼誰與朝夕氏從之衣縞素斷葷血日紡績養姑課子讀書夜則博觀經史小學列女傳諸書獨不信佛守節五十年壽逾七十

熊氏青州人父慶澤來家於吳女生而端慧通經史許聘無錫秦漢漢暴死女泣不食謂侍婢曰吾死尸當歸秦自縊者再皆以救免有馬謙叔者慕其賢為子求婚女聞引刀斷髮截

其右耳流血仆地父母急傅以良藥久之乃甦願終身侍父母側及漢葬衰服送之以堊塗其旁為一穴曰吾終歸於是

太守扁其堂曰貞烈月致薪米王鏊傳嘉靖六年旌表

俞氏吳縣學生顧春妻春患病將革與俞訣勉其守節俞號泣

不止因以指抉雙目不得出乃以剪刺其左目血流遍體復

欲刺其右姑奪其剪諭之曰爾欲養舅姑育二子留其一目

可也越六日春卒姑蘇志

顧氏貧家女幼字許某許不肖而貧倩媒議改字返聘女曰有

死無二父母弗能強許憾訟之官知縣宋儀望廉得其情重

笞許而嘉其志女依兄弟以居終身不笄年逾八十而終縣志

沈成德妻徐氏西洞庭人年十五歸沈事後姑盡孝成德客死

遺孤三人皆幼家貧舅姑強其改嫁氏斷髮毀形誓死不奪

冬夏棲止斗室中風雨不蔽日不再餐守節五十五年王志堅傳

余佈妻馬氏橫塘里人養姑以孝聞嫁甫五年夫死無子生一

女姑欲奪其志有田二畝半粟弗與馬不為動姑潛納某聘

一夕鼓吹臨門姑趨治粧入臥室自經死几上尚有食糠二

器徐鳴時橫塘志

韓廷珪妻孫氏廷珪以販蓆寓滄陽孫與二女金蓮玉蓮隨宸

濠陷九江廷珪適往龍坪鬻貨人勸孫逃孫顧女曰逃必污

辱計惟一死女曰生死無相離於是母女共取長繩繫腰赴

河死孫年三十五女長年十四幼年十一至嘉靖初分守參

政范永鸞勘實奏聞得旌

陸嘉穎傳 按明史作衛廷珪誤

三貞女嘉靖癸丑夏倭寇吳中行劫婦女一弱女乘閒得逸父

母行求得之號泣曰吾力不能自衛求死未得何顏復存世

閒遂投河死失其姓氏又蔡氏女者寇來家衆皆奔女徬徨

不知所之賊執而褫其衣驅之前至橋邊躍入水復援登岸

至暮俟賊寢取其刀連刃之不能殊賊驚呼磔其肢體又韓

碧溪女素有志操聞賊之暴嘗誓於父母曰緩急不能相顧

惟不爲門戶羞耳賊至遂投於河賊援之出復奮而投竟溺

死焉

劉鳳續吳錄

五貞婦嘉靖癸丑倭至洞庭東山周灣見一哀服少婦強驅之

婦懇曰人皆奔避我以夫喪在故願死守白刃固甘之但有

嬰孺姑老病莫養艷者固多何必此窮悴者賊義而釋之又

隣婦某氏賊犯之不從刀斫其鼻愈奮而起乃置之而淫他

婦又一小家女寇始及門倒投井中死一婦守視夫病聞外

哀號聲卽自刎周山又有婦少而麗導者知之引賊至其室

婦以帛周身束之不可解且詈賊賊怒以刀裂其體無完膚

續吳錄

洞庭少婦爲倭所掠過獨板橋二倭前後扶曳側足而行進至

橋心婦兩手堅握倭臂號呼踴而墮水二倭爲所牽俱溺死

蘇州府志 卷之六十八  
又有夫婦相攜避倭匿渡僧橋下被船內倭搜得之殺其夫  
婦叫罵不從倭執刀恐之罵益厲竟爲腰斬其夫中刃未殊  
得不死收葬婦終身不娶

舊府志

曹鑑長女蘇州衛屯軍避倭以小舟載蘆葦中賊至先抱幼男  
官壽赴水尋自溺後撈出母子尸猶相抱

黃魯曾  
往哲記

陸某妻浦氏早寡撫孤子桂成立桂亦至孝母失明徒跣二十  
里禱周孝子祠母目豁然年登九十無恙萬曆二年以母貞  
子孝同旌

邑志

殷國彥妻潘氏木瀆人年二十二而寡茹齋守志至六十九歲  
預刻死期及期櫛沐整衣不進飲食家人固請曰此間無受

處含笑而逝

馮翼瀆  
上編

殷貞女貢生殷懷沖女七歲喪母哀毀如成人年十六字陳元  
儁未嫁元儁卒女聞卽閉閤自經以救免仍絕食求死兄時  
偉譬解之女曰卽欲苟延乞請之父俾我成服往弔父慮女  
往且死難之女曰吾敢重父憂乎乃手割左耳盛器中授時  
偉爲我持此往祭慟絕而甦事聞府縣上牒御史請旌女堅  
辭乃止日惟坐臥小樓縞衣藿食嘗患危症矢不延醫曰吾  
求速死安可令醫指着我臂耶越十年爲萬曆丙午病卒

王  
志

堅  
傳

陳惠妻須氏善人橋農家女年十九適陳惠早亡無子土豪顧

臣艷其姿欲攘為妾糾黨百餘入其居強娶之翁姑涕泣莫敢誰何氏獨怡然密赴後園自經死知縣周爾發痛咎擬抵將上其事於巡按御史請旌會爾發調任未果

王志堅傳

戈氏女家百花洲三歲父許字徐某子後徐子殤女誓不他適家人恐其未必堅以他言試之遂截耳以矢終身一室中

馮翼

續上編

須烈婦吳縣人

邑志梅社人

夫李死市兒悅其色爭欲娶之婦泣曰

吾方送一夫旋迎一夫且利我夫之死而妻我不猶殺我夫

耶市兒乃糾黨聚謀將掠之婦驚奔母母懼不敢留返於姑

姑懼如母投姊姊益不敢留婦泣而歸隣人勸之曰若即死

誰旌若節者何自苦若此婦度終不免遂自經死

明史

太學生姚汝轍妻文氏衛輝同知元發女也年十五歸姚二十

二汝轍歿時子希孟生甫十月氏事兩姑乳幼子茹荼四十

年希孟起孤生以長洲籍登第文章操行為時名臣得之母

教為多萬曆二十四年巡按御史薛貞題旌

王志堅傳

吳琛女家石湖東薛家村少字莫周末嫁周死父欲改字常熟

張某官通判者方委禽女求死不食五日父知不可奪乃止

年九十一卒

徐鳴時傳

趙宦光妻陸卿子尚寶卿師道女夫婦偕隱寒山宦光寡學而好著述師心杜撰不經師匠卿子學殖優於宦光遠甚詞章

翰墨流布一時有雲臥閣及考槃元芝等集

列朝詩集

徐媛字小淑參議范允臨之室允臨以臨池負時名而小淑多

讀書好吟咏與寒山陸卿子唱和稱吳門二大家

列朝詩集

周氏東洞庭人年十九適曹憲輅越二歲憲輅病羸竭力醫禳

盡傾奩資歷五年憲輅病篤屬氏兄曰我負此賢婦當善遣

之氏聞之曰是何言哉我不欲先死恐傷君耳及卒從容爲

夫沐尸更衣并易己衣周身密縫之自縊夫側

陳宗之傳

沈氏吳江人從父徙吳適黃居堂家壁立工丹青年二十四居

堂死斂畢卽投纆居堂兄覺之泣曰弟無後而有遺孕倘生

男弟不死矣氏拭淚從之屏處一室椎髻垢面日勤刺繡或

臨夫畫冊粥斗粟自給後果生子元吉稍長卽課之讀篝燈

緝績每隆冬單衣膚肉皴瘃至夜半欲寐引針自刺其臂年

餘五十父患瞽無子獨棲臯峰山氏曰非吾奉養不能全父

餘年矣乃歸父茅舍親刈草舂米以供朝夕崇禎十年提學

御史以聞詔旌節

陳宗之傳

殷桌妻葉氏東洞庭人桌客遊得疾歸遂卒氏視含殮畢投纆

死時年二十八

金俊明傳

文俶字端容貢生從簡女明書習禮歸趙宦光子均宦光歿均

家日落而好賓客俶性明慧所見幽花異草小蟲怪蝶信筆

渲染皆能撫寫性情鮮妍生動圖得千種名曰寒山草木昆

蟲狀摹內府本草千種千日而就又以其暇畫湘君擣素惜  
 花美人圖遠近購者填塞貴姬季女爭來師事凡酒食旨蓄  
 晨夕百需靡不出俶十指中均不知其所由辦也無子有女  
 曰昭嫁平湖馬氏有才藻而孝俶夫婦歿手撰事狀使嗣子  
 錕請銘於錢謙益錢謙益誌

張敏德妻楊氏崇禎時寇發居民奔竄氏促夫負孀姑先逃罵  
 賊嬰刃死

申允庚妻周氏嘉定伯奎女也甲申之變不食死

齊某妻張氏諸生宏謨女也孀居乙酉兵至自刎不殊有錦衣  
 者至兵指曰此將主也從之則富貴大罵被殺又夏尙伊妻

周氏同女壽姐避難華家墩兵至皆不屈死又諸生盧啟祥  
 妾蔣氏王化民妻黃氏守備吳自龍妻周氏曹廷禧妻錢氏  
 諸生徐昌妻韓氏丁浦母李氏諸生薛咸妻宋氏陸四妻湯  
 氏張仲奇妻曹氏金滿妻徐氏武進士陳智錫妾湯氏侍女  
 丹鳳指揮吳元韶弟婦某氏諸生張起英二女皆投水死唐  
 雲泉妻顧氏自經死諸生毛澤卿妻某氏諸生徐樹聞妻張  
 氏皆不屈死錢延卿妻袁氏徐某妻曹氏皆自刎死徐秉義忠烈紀

沈氏女許字黃于庚未嫁夫亡女年十九父母議改適女聞閉  
 戶自縊以救甦自是縞素棲止一樓家人罕得見鼎革時兄



欲攜之避兵女曰樓居三十年死固吾分奚避為遂絕粒死

于庚弟家芳迎女柩與于庚合葬虎邱縣志

席啓章妻張氏東洞庭人乙酉山中兵擾姑欲挈之奔避氏素

有跛疾謂姑曰不走則被執走則累姑我寧死不受辱遂乘

聞自縊

歷年旌表貞節凡列女事行具載如前其舊志所載事蹟略同或未詳者分已旌表與未旌表

各彙著姓氏於後餘縣仿此

張成妻唐妙堅洪武七年旌宋濂作旌門頌姚榮妻黃妙清洪武七

年旌蘇伯衡作旌門頌陳可久妻孫氏洪武七年旌媳孫氏亦早寡守節徐有貞作

雙節呂元哲妻錢氏洪武二十八年旌蔡仲彬妻夏氏永樂

初旌印仲彬妻周氏永樂四年旌戴君用妻吳氏宣德三年

旌王友諒妻陳氏宣德十年旌諸生俞毓妻狄氏正統四年

旌姚宗敏妻盛氏正統六年旌諸士賢妻祝氏正統六年旌

孫泰亦早卒妻張氏守節奉祖姑郁信妻矯氏成化五年旌顏鉉妻吳氏成

化十八年旌蘇倫妻陸氏成化十九年旌李芳妻傅氏弘治

十一年旌王昂妻唐氏弘治十二年旌進士顧竑妻杜氏弘

治十三年旌楊貴妻唐氏正德三年旌顧應祥妻朱氏正德

十六年旌賀元良妻吳氏嘉靖元年旌顧昂妻范氏嘉靖十

五年旌劉炳妻杜氏萬歷初旌殷相如妻錢氏萬歷十九年

旌許聘袁某徐氏女萬歷二十七年旌繆天秩妻張氏萬歷

三十四年旌倪必裕妻徐氏天啓四年旌顧天爵妻陸氏天啓六年旌翰林李名芳妻沈氏天啓七年旌許震妻徐氏崇禎初旌王士英妻徐氏崇禎四年旌嚴林甫妻劉氏崇禎七年旌許明臣妻翁氏崇禎十年旌席時龍妻吳氏崇禎十四年旌周重仁妻王氏嗣子士元妻陸氏崇禎十四年姑節婦孝並旌徐道統妻顏氏

本朝乾隆五年旌

未經旌表貞節

虞禎子婦陳氏顧氏婉寧徐襄妻蔡氏子義妻馬氏吳孟實妻徐氏賀元吉妻金氏朱鑰妻葉氏馮旻妻蔡氏子時春妻

陸氏蔣鉞妻施氏張有光妻李氏夏雨妻趙氏錢汝威妻朱氏陳同河妻朱氏計廷貴妻沈氏朱仲昇妻曹氏孫尙志妻錢氏馮汶妻朱氏許字鍾某殷氏女胡應時妻張氏龔元齡妻陸氏韓與爵妻俞氏子懋康妻文氏尹焯妻馬氏劉誠妻張氏諸生伊應錦妻夏氏殷志棟妻胡氏沈鵬祥妻金氏沈某妻談氏陳用妻某氏史雲翔妻黃氏國子生姚大綬妻金氏李明宇妻徐氏錢某妻陸氏葉禹妻席氏吳安忠妻周氏王廷貴繼妻管氏許字張應龍周氏女袁應詔妻吳氏

本朝

○嚴燦妻顧氏柳社人年十四歸嚴善事舅姑得婦道順治二

年羣盜陳攀等劫富豪金華家明年二月攀繫獄華與燦素有隙誣以攀黨始擬戍後改辟七年 敕按臣覆讞氏挾刃懷牘至御史前自刎死其詞有曰夫死日促婦生奚益與其死於夫歿之後孰若死於夫存之日棄氏尸於市衢以彰冒犯之罪救夫命於縲紲以伸冤抑之情觀者歎息會御史還臺不及平反八年御史秦世禎按吳廉其實疏白燦冤表氏為烈婦寘華於法

縣志

○周文遂妻馬氏東洞庭人年二十二文遂死無子氏截一指納棺中曰吾弗忍即死以待吾夫葬也居二年姑歿又二年父哀其窮呼歸諷改節氏持斷指曰此不能復伸矣泣而歸

周家人疑之防視甚密氏據牀製鞋歡笑如故是夕闔戶自經死家人晨入衣袂肅然殮事無不先具惟鞋乃昨所製也時年二十六總河朱之錫題其塚曰清故安節烈婦馬氏之

墓

縣志

○圻者袁七妻陳氏唐村人舅姑早歿生一子甫週歲七傭作數出比隣惡少周二輒調之正色屢拒一日叩門乞火將犯之氏大聲詬呼乃去因促夫徙居夫曰貧不能徙盍以刀自衛康熙四年正月十一日夜二潛身啓鍵入氏驚起揮刀斫之中其手二奪刀還斫殺氏復斷其首而走逃至安山橋忽見紅霧四合遂迷所之為隣里所獲鳴官斃於獄巡撫韓世

琦為立碑里人建祠以十節婦配焉十節婦者顧祖淳妻高氏趙弘祖妻施氏王士元妻沈氏王永茂妻張氏金憲文妻顧氏朱鍵妻吳氏袁承佑妻鍾氏徐聖妻金氏朱士才妻陳氏楊家未婚女徐氏皆同里也

舊府縣志合纂

○鮑邦舜妻蔣氏旌德人寓吳年三十夫亡撫七歲孤效良苦節歷四十年人莫之知也後效良以母病誓神登胥城剖腹得肉歸煮湯飲母病遂愈紳士造廬致敬效良具述母節甚悉里閭以聞康熙十八年巡撫慕天顏請旌其母額獎效良

縣志

○沈子猷妻金氏夫亡宗黨逼改適不從子猷有姑同居素與

隣周丑通并欲汚氏氏大罵被擊仆地而死巡撫湯斌勘實

姑與丑棄市氏請旌表

縣志

○管正偁妻徐氏夫早亡誓以身殉一女甫二歲提抱極踈曰

姑甚慈盍累諸一日方晡登樓燃香誦經屬婢滄茗俄而香

在佛前氏經隔下矣

舊府志

○蔡瓊藻妻周氏名壽英西洞庭人瓊藻有心疾其兄瓊滋輒往調之壽英訴諸姑姑反恚曰若嫌若夫不慧今得慧者顧猶不快耶瓊滋益無忌復走調之壽英知不可訴急自縊死時年十有九里人洵洵將控之官會父之球遠客湖廣蔡氏復納賄止其事寃遂不白康熙十五年壽英死二十餘年矣

璽滋忽夜發狂鍵戶手刃其妻與所生女乃自刺死明日家人開戶見三尸相枕藉大駭有小婢匿牀下具言中夜窺見一紅衣女子往來室中若導之使殺者衆始悟爲壽英魂紅衣蓋壽英大殮時所服云

汪琬撰墓表

○顧汝絃妻沈氏東洞庭人夫亡哀號絕食五日不死尋自刎仆地復起整衣而逝有司獎之

○王氏女許字金上孚未婚聞訃欲奔喪不得哀號成疾瀕死謂父母曰兒雖未嫁然夫婦之義已定宜上金氏圻隴同穴而葬舅姑哀其志許之女遂卒

○陸氏陽山農人女許字某未嫁夫亡父母欲奪其志不食數日死

○黃永祥妻劉氏永祥因兄負客逋連累被逮懼刑投河氏大慟亦赴水死郡守陳鵬年立祠表之

以上俱舊府縣志

○惠有名妻李氏年十九歸惠生子世俊未周晬遭明末亂有名遇難氏撫孤矢節有族子挑之又諷以改適氏以刀自刺不殊忽雷電交作天地晦冥族子懼而止乃依姒氏以居常縫紉自給久之積所留衣船之敝者鑄銅杓錫壺兩器遺世俊曰人之積學猶如是矣守節五十七年康熙四十二年旌

徐葆光撰傳

○諸生郭可妻陸氏姑病刲股以進尋愈越半載又病亦如之

及可病復剗股療之各憲額獎縣志

○戴氏女許字吳其機夫亡女衣麻茹素誓不更字服將滿投

繯死年二十五康熙六十一年旌

○周啟賢妻龐氏夫歿即欲身殉舅姑勸止越日投繯死年二

十三

○李遜如妻陸氏早寡俟夫入土赴河死吉安守吳銓義之捐

貲購地遷其夫棺合葬研山麓

○葉氏女東洞庭人許字王氏子未嫁夫亡女成服詣柩前斷

指自誓聞有議婚者乃縊死通志

○邵氏女字申希文未嫁夫亡聞有他姓議婚遂絕粒死通志

○申氏許字錢歷才未嫁夫亡自縊通志

○監生盛大業妻歸氏年二十二夫亡撫三歲孤誦脩勗以學

行歲饑針黹易米供姑已齧糠粃夜與姑同衾省視寒燠娶

媳高氏善事孀姑一如歸云雍正三年旌

○曹符妻蔡氏夫亡紡織自給得粟先飯姑及子女而已常忍

饑有老嫗屢勸改嫁氏拔刀自刺姑急抱持之養姑至九十

壽終子嘉愈為縣學生雍正三年旌

○羅廷佐妻錢氏夫客死聞訃自經雍正五年旌

○施水蒼妻陳氏嫁甫三月夫亡忍死養姑姑歿氏亦絕食死

乾隆二年旌

○符水女許字嚴有政未婚聞訃過門成服姑與母商奪志卽閉戶自縊乾隆二年旌

○貝啓祚妻程氏在室時父病瘍氏親吮其毒染病幾殆年二十七夫亡誓殉奉姑命撫七歲孤成立守節三十二年乾隆三年旌

○張雲翔妻周氏年二十一夫亡自食鹽滷以殉按察使徐士林表之

○周鉅妻江氏年二十四夫亡遺腹一女紡績奉姑撫姪爲嗣忍寒夜績竟凍死時身衣破苧牀無藁薦也乾隆八年旌

○賈氏太學生南式女十八父病女侍湯藥晝夜無倦及父歿哭絕復蘇視殮畢乘閒自經乾隆九年旌

○董彩姐瑞聲女瑞聲夫婦往田工作比隣黃如詣門狎之女奔訴父母如逸去女不勝忿乘閒自縊如論死乾隆九年旌

○吳氏女名淑貞東山後巷人許字白沙葉公序公序染危疾訛傳其死淑貞方刺繡聞之卽飲泣登樓自縊時康熙七年八月二十三日也年十七

○葉建章妻周氏楊灣人年十九嫁甫一月建章服賈松江尋病死姑恐傷其心弗令知氏潛覺卽欲自盡姑謹防之一日伺婢睡熟遂起梳櫛整衣裳周身密縫自縊死時變起倉猝棺衾無措姑夜夢氏告曰篋中有銀十餘兩足辦後事啓之

果符所夢焉康熙九年事

○徐氏女湖沙人許字葉懷德懷德病瘵卒訃至夜投後園池中死

○康鈇妻葉氏東洞庭人年十九夫亡有勸改適者氏以頭觸地血淚被面翁姑懼密防之伺稍懈卽自縊去夫死八日康熙十九年事

○嚴信任妻陳氏武山人年二十六夫亡一子又殤氏卽欲自裁以夫棺未葬隱忍七年及營葬畢遂投繯死上下衣皆密縫事在康熙二十五年

○秦弘道妻葉氏年二十五夫卒氏日夜號泣絕粒死時康熙

三十一年

○施氏名婉貞東山人知禮節通文墨年二十適金灣吳翰章越四載而寡無子氏忍死奉夫遺命爲立後又拮据葬其先三世繼姑弗恤謀奪其志氏知終不免乃題絕命詞四首於壁自經死檢討張大受爲作哀辭

○周魯源妻嚴氏年三十魯源病卒氏投井死距夫死纔三日

○周國兆妻席氏下席人年二十夫亡踰月自經死

○王世榮妻葉氏楊灣人年十八嫁越五年夫病氏典衣飾以供湯藥焚香籲天願以身代疾竟不起氏絕粒五日而死時

康熙六十年



○沈氏女東山人父母早喪依兄鑑明以居許字張文煒文煒病歿鑑明祕不與聞久之乃覺闔戶自經死張氏迎其柩與文煒合葬

○朱大櫛妻席氏東山人夫亡四日自縊以殉已上十二人皆武山吳莊所采訪

○蔡軒明妻殷氏西洞庭人乾隆十一年壽百歲撫臣疏聞奉旨建坊旌表加 賜銀十兩內造緞二疋

歷年旌表貞節

張弇妻閔氏順治十年旌朱基妻錢氏順治十五年旌生員黃薇妻鄭氏吳嘉諭妻張氏生員蔣垣妻盛氏俱康熙十八

年旌監生胡汝濬繼妻王氏康熙二十年旌生員沈元鼎繼妻趙氏康熙二十二年旌孫廣妻陳氏生員吳之翰妻金氏馬應貞妻王氏俱康熙二十三年旌生員殷佑寧妻周氏生員倪兆麟妻湯氏長媳皇甫氏尤文鳳妻沈氏俱康熙二十五年旌舉人顧弈榮妻吳氏生員王憲文妻申氏生員沈懋敬妻李氏朱尚仁妻錢氏管邦傑妻周氏陸禹鰲妻毛氏俱康熙二十六年旌范以時繼妻胡氏生員項垓妻毛氏俱康熙三十六年旌監生王聖業妻沈氏徐肇和妻何氏監生黃喈妻許氏俱康熙三十九年旌陳廷瑞妻邱氏生員蔣佩妻陸氏俱康熙四十二年旌張文俊妻嚴氏監生陸煥妻沈氏

俱康熙四十五年旌王滂妻申氏康熙四十八年旌監生汪立玉妻方氏吳公遜妻王氏俱康熙五十三年旌毛家楨妻周氏譚昌嗣妻朱氏俱康熙五十七年旌生員申琳妻王氏湯世忠妻倪氏馮彩生妻過氏俱康熙六十一年旌監生王盛業妻沈氏康熙年間旌生員繆士宏妻沈氏徐大鵬妻李氏徐日瑛妻邱氏俱雍正元年旌生員許愈顯妻陸氏蔣躍龍妻談氏朱鍾妻張氏汪文珩妻倪氏沈成妻汪氏石介藩妻章氏吳中義妻葛氏喻昌聲妻張氏生員蔣壩妻朱氏陸永思妻張氏黃之暉妻沈氏石琬玉妻尤氏許字方國貞徐氏女許字徐衡喻氏女俱雍正二年旌湯自申妻顧氏阮祥

龍妻顧氏潘可楷妻丁氏生員王華嶽妻沈氏龔飛熊妻嚴氏陳之棟妻顧氏沈成琛妻陸氏沈永正妻范氏生員金友張妻龔氏鮑日昇妻程氏陸雲章妻黃氏程澹妻陸氏監生吳名錄繼妻沈氏吳聖基妻張氏金尙敬妻龔氏陸錫錄繼妻劉氏俱雍正三年旌徐士裕繼妻王氏許明卿妻惠氏惠萬錫妻王氏袁國章妻林氏許字施天祐樊氏女俱雍正四年旌金理妻許氏莫蘭森繼妻張氏張必達妻孫氏張子先妻方氏錢士魁妻俞氏李嘉劬妻許氏殷善運妻張氏俱雍正五年旌席永臻妻金氏陸注妻徐氏沈自灝妻張氏秦世芳妻李氏俱雍正六年旌湯觀文妻施氏張迥妻陳氏徐君

倣繼妻張氏蔣枚妻顧氏包宏聲妻張氏金梧鳳妻劉氏朱  
 日義妻周氏朱日華妻曹氏沈其謨繼妻殷氏朱起鳳妻尤  
 氏吳禹傳妻曹氏瞿履祥妻汪氏張祥卿妻杜氏俱雍正八  
 年旌許雲液妻王氏衛學坤妻沈氏陳奔銓妻周氏陳文睿  
 妻鄭氏熊楷妻顧氏熊吳桓妻程氏朱善斌妻許氏俱雍正  
 九年旌吳永臨妻翁氏夏九洲妻蔡氏孫均妻汪氏吳中恒  
 妻葉氏郭愨妻龔氏章周燧妻馮氏張德純妻汪氏俱雍正  
 十年旌朱應智妻顧氏嚴信通妻許氏許西美妻周氏生員  
 蔣猷妻嚴氏毛廷相妻吳氏陸非熊妻馬氏謝其蔚妻孫氏  
 張茂喜妻陸氏中書汪與圖妾張氏胡金仙繼妻陶氏監生

章克勲妻周氏許字李湛沈氏女俱雍正十一年旌監生王  
 祖孝妻高氏華岳高繼妻沈氏徐雲峯妻袁氏李芳華妻郭  
 氏張如鶴妻顧氏張廷相繼妻周氏邱自珍妻陸氏陸允謙  
 繼妻曹氏陸時霖妻曹氏張錄妻龔氏吳世隆妻金氏陸雲  
 從妻金氏李東發妻潘氏金連城妻馬氏程天錫妻朱氏俱  
 雍正十二年旌監生吳瀚妻徐氏計廷琇妻郁氏徐芬妻劉  
 氏沈廷恕繼妻洪氏陶天錫妻楊氏吳高繼妻陸氏俱雍正  
 十三年旌汪肇恒妻俞氏胡廷璧妻葉氏張國祥妻俞氏趙  
 良璧妻張氏袁永錫妻徐氏陸鴻業妻邱氏范洪緒妻宋氏  
 鮑以銳妻沈氏李大昌妻黃氏吳濟繼妻史氏陳玉田妻蘇

氏汪經璧妻沈氏陸珍在妻龔氏陸文起妻朱氏黃文學妻  
 王氏陳鶴齡妻王氏鄭啓章妻陸氏陳熊妻王氏姚士俊妻  
 朱氏陳機妻謝氏朱成賓妻王氏沈有寧妻顧氏范子發妻  
 郁氏薛青士妻石氏張幼鐸妻何氏芮方時妻陳氏李大榮  
 妻程氏俱乾隆元年旌張兆升妻孫氏時敦仁妻徐氏吳肇  
 遠妻周氏生員龔慶銘妻徐氏李雲章妻周氏朱予桓繼妻  
 江氏劉衣錦妻丁氏馮兆龍妻金氏鄭啓謨妻葛氏程兆復  
 妻顧氏張耀祖妻趙氏范漢年妻朱氏張寶城妻陳氏曹天  
 祐妻孫氏王文祥妻葉氏張雲繡繼妻錢氏王昇重妻朱氏  
 潘克順繼妻申氏吳燦如妻葉氏王德載妻倪氏鄭啓鏞妻

陸氏張克士妻徐氏潘瑞華妻顧氏盧應亭妻顧氏劉循妻  
 蔣氏徐三辰妻周氏孫禎妻吳氏楊桂妻鮑氏徐祥生妻洪  
 氏林世祿妻湯氏張三彪妻孫氏王聖友妾任氏沈寅妻許  
 氏吳之錡妻葉氏朱元臣妻葉氏馬是龍妻金氏顧念山妻  
 許氏劉美妻姚氏程國裕妻汪氏王紹宗妻朱氏張杰妻陸  
 氏沈道治繼妻丁氏金鼎臣妻鄒氏韓守曾妻周氏顧聞韶  
 繼妻朱氏張景星妻奚氏龔元棟妻陳氏俱乾隆二年旌生  
 員汪學舒妻鄒氏蔡鳴球妾倪氏江濤妻陳氏薛昌裔妻朱  
 氏盛伯華妻周氏鄭啓亮妻翁氏徐允清妻湯氏朱元龍妻  
 蔡氏鄭明儀妻奚氏吳藩妻倪氏沈正昱妻張氏李銓妻黃

氏妾曹氏俱乾隆三年旌王榮宗妻周氏監生王耀基繼妻  
蘇氏張御六繼妻郭氏張嗣昌妻陸氏趙成德妻徐氏周鈺  
妻馮氏汪受密妻余氏秦元悌妻鄧氏鄧道干妻蔡氏孔興  
恭妻劉氏張顯祖妻鄭氏濮在天妻潘氏石文英妻張氏江  
士駒妾陸氏陳自鎖妻曹氏曹仲溪妻張氏周宏德妻張氏  
鄒待聘妻周氏林天錦妻謝氏裴士衡妻蘇氏周永章妻金  
氏林天鑑妻徐氏裴世俊妻陸氏吳汝鏡妻馬氏顧滋妻汪  
氏張柱侯妻盛氏高傑妻曹氏倪元鏐妻袁氏沈念典妻李  
氏葉漢賢妻周氏許字秦萬授吳氏女許字孫紹文馮氏女  
許字湯怡庵陸氏女許字許文韜諸葛氏女俱乾隆四年旌

陶學詩妻馬氏子仁趾妻于氏生員陳又龍妻吳氏薛起麟  
妻黃氏陸永藩妻陳氏劉子瑞妻項氏龔大賓妻顏氏周君  
顯妻莫氏虞堯臣妻高氏張啓序妻徐氏鄭仁漢妻蔣氏沈  
兆源繼妻王氏卞王臣妻虞氏張弓妻程氏葉鳳儀妻諸氏  
王仁孚妻張氏吳時珍妻顧氏鄭洪度妻嚴氏席本稔妻夏  
氏吳定功繼妻翁氏秦元在妻吳氏王爾興妻陸氏潘景曜  
妻張氏勞棟妻戈氏汪家聲妻朱氏沈允文妻王氏鍾時俊  
繼妻姜氏項繼悌妻吳氏金尙爵妻陳氏葛國治妻陳氏安  
大已繼妻楊氏蔣汝翼妾龔氏湯卓侯妻朱氏吳永肩妻葛  
氏許字陳樸民楊氏女俱乾隆五年旌江用受妻高氏夏遜

來妻蔣氏盧廷表妻王氏汪蔣勳妾陸氏韓廷璋妻沈氏程  
 弈璋妻劉氏程廷錦妻吳氏顧魯唯妻沈氏潘世良妻江氏  
 張宗福妻程氏王文鏞妾張氏高燦如繼妻周氏吳公美繼  
 妻顧氏石履安妻李氏練鳳彩妻金氏俱乾隆六年旌監生  
 夏珍繼妻姚氏蔡起貞妻姚氏邵廷珍繼妻周氏尹惟憲繼  
 妻袁氏朱宗洪妻周氏吳志夔妻金氏汪明道妾丁氏張瑞  
 生妻馬氏嚴雲山妻談氏張之澗妻譚氏金孝書妻葛氏申  
 世厚妻李氏席起諧妻姜氏張大業妻邱氏王璠妻黃氏程  
 士先妻潘氏陳鳳苞妻王氏熊廷柱妻袁氏舉人申可貞妻  
 李氏妾曹氏俱乾隆七年旌吳觀琳妻石氏汪文玠妻許氏

顏學洙妻孔氏張正維妾孫氏王聖瑞妻徐氏黃程九妻孫  
 氏韓承年妻吳氏徐端聞妾何氏徐子蘭妻張氏張祖良妻  
 許氏吳文麟妻歸氏高斗曜妻董氏吳國英妻徐氏陳鏞妻  
 楊氏俱乾隆八年旌陸舜祺妻錢氏章煥三妻劉氏談如敏  
 妻王氏張士錦妻陶氏高允公妻姚氏范昱妻張氏朱桓妻  
 曹氏楊承忠妾曹氏錢嘉瑞妻周氏謝士傑繼妻徐氏顧君  
 祥妻莊氏周麟玉繼妻顧氏邵言璋妻李氏吳聖宣妻孫氏  
 周公轍妻張氏許字李燊朱氏女俱乾隆九年旌吳時夏妻  
 湯氏童發乾妾顧氏朱文謨妻高氏秦朝覲妻黃氏張詵兮  
 妻談氏王行簡妻吳氏陸志栒妻朱氏顧惠玉妻張氏潘景

文妾高氏吳沛生妻施氏金禹宏妻徐氏王一柱妻吳氏顧安國妻朱氏翁座週妻顧氏汪鼎言妻陳氏沈珏妻鍾氏陸士鉉妻汪氏許字葉鎬成周氏女俱乾隆十年旌

未經旌表貞節

生員何一沐妻金氏

督學李嵩陽加獎

孫瑜妻羅氏子景昇妻吳氏

景期妻顧氏稱一門三節屠蜃妻張氏席本宗妻姜氏

巡按秦世

顧獎席啓宸妻張氏

秦世顧獎

金端範妻王氏

巡按孔允鉞獎

陳雲臺妻王

氏

巡撫張中元獎

張念川妻沈氏申用寧妾陸氏陸一柱妻盧氏

巡撫

韓世琦獎

張問政妻陸氏

巡撫湯斌獎

沈文謨妻王氏妾朱氏

知府陳鵬年獎

顧宏業妻王氏屠某妻徐氏顧朝瑞妻尤氏王鏞妻張氏孫

琦妻蔣氏張士忱妾曹氏沈光被妻湯氏唐文德妻潘氏關

子雍妻鄒氏張文臣妻吳氏徐苟六妻朱氏張祥卿妻杜氏

陳兆嘉妻蔣氏陳九齡妻郭氏黎東景妻賀氏申用中繼妻

韓氏申樹芳妻陳氏申允亮妻陳氏申允蘭妻王氏申允薇

妻王氏張敬妻李氏袁燦妻韓氏生員沈汝舟繼妻王氏張

某妻倪氏徐德徵繼妻蔡氏子引年妻蔡氏方兆嘉妻沈氏

許字朱輔臣方昭英許字陶松齡張氏女





